



15
1301
12



門 5
號 1301
卷 12

唐文拾遺卷之三十六

榮祿大夫三品頂戴前分巡廣東高廉道加四級臣陸心源輯

崔致遠

奏論抽發兵士狀

當道先准詔旨抽廬壽滁和等州兵馬其二
萬人仍委監軍使押領赴軍前者臣當時已
各帖諸州令排比點檢次又得進奏院狀報
近奉詔旨更於諸州催促兵士者

右臣伏以兵惟飾怒雖尙勇於戰征師克有和固推
誠於輯睦苟非得眾何以成功臣當管廬州與和州

昭和十一年
二月十四日
購求

舊有讎嫌至今疑忌唯謀以怨報怨未遂知和而和
孫端新授滁州又與秦彥有隙既是滁和接境動有
他虞若於光蔡會軍必酬舊憾事非便穩理合奏論
臣自得招降多方控馭粗能禁戢免有動搖如令各
出兵戈必恐自相魚肉輒陳利害冀慎始終謹錄奏
聞伏聽勅旨

奏請叛卒鹿晏宏授興元節度使狀

右當道賀正子將許令琮等今日日迴得狀稱三月
五日陳許軍潰散節級鹿晏宏領兵馬二萬餘人打
破金洋等州突入興元府坐節度使牛勗四日夜領

隨從人并家累約二千餘人奔投龍州西山山谷者伏
以天未悔禍地多受災旣當易動難安非可懲一勸
百鹿晏宏早駢散卒廣集叛夫始聆焚劫東都旋見
奔衝西路本道節度使周岌累令招諭終不歸降豈
興破浪之風但熾燎原之火今者逆黨則鯨吞盛府
元戎則鼠竄危途爪距已成根株難剗儻或未恕亂
常之咎別興伐叛之師卽恐終成一秦固應不利三
蜀且列藩貢獻諸道表章得達刀州皆由劔路況乃
鳳城已復鑾輅將旋縱令鷓鴣在天能摧狡窟若更
豺狼當道必礙行宮峽路雖通水程多慮不唯險阻

實且遐遙兼至上江皆爲賊境唯憂進獻莫遂通流
臣久竊寵光深懷驚憤遠詳事意輒具奏陳伏乞聖
慈霽雷霆之威迴雨露之澤速飛寬大之詔特委撫
綏之權鹿晏宏免致磨驚便當豹變必當克己永務
安人聖主含宏旣宥其窮斯濫矣姦臣警悟亦免於
尤而效之謹錄奏聞伏聽勅旨

進金銀器物狀

金器 銀器

右臣伏以烟塵向息道路猶虞每慙仗鉞之榮多曠
獻琛之禮得申遠貢唯有輕資前件金器銀器等質

變披沙形分鑄礫雖愧易盈之用且資虛受之功固
敢竭航波梯燼之心助麟趾馬蹄之瑞貢金三品空
陳任土之宜望闕九重未遂朝天之願感恩何極戀
聖徒勤今差押衙王虔隨狀奉進謹進

進漆器狀

當道造成乾符六年供進漆器一萬五千九
百三十五事

右件漆器作非淫巧用得質良冀資尙儉之規早就
惟新之製雖有慙於瓊玉或可代於瑠瓶伏緣道路
多虞星霜屢換器貢難通於萬里綱行遂滯於三年

既失及時唯憂虛月臣今差押衙銀青光祿大夫檢校太子賓客兼御史中丞上柱國辛從實押領隨狀奉進謹進

進御衣段狀

當道先兼鹽鐵使織造中和四年已前御衣羅折造布并綾錦等除先進納外續織造九千六百七十八段謹具如後物色

右臣久權筦貨素乏籌謀多虧山海之資莫報雲天之澤前件御衣并綾錦綺等薄慙蟬翼輕愧鴻毛然而舒張則凍雪交光疊積則餘霞鬪彩既成功於鳳

杼希入用於龍衣儉德彌彰致美宜光於敝冕皇恩遠燭輸誠必鑒於絲毫其正段物等臣謹差某官某押領隨狀奉進謹進

進綾絹錦綺等狀

進奉綾絹錦綺銀等一十萬疋段兩謹具色目如後物色

右臣伏以兵戈充熾郡邑凋殘仰思御輦巡遊唯恨賦輿懸闕况乃當道巡屬之內招降頗多皆請占留將充供贍貴息寇戎之患難豐進獻之儀前件綾絹錦綺等雖製自鴛機而價慙鮫室實謝八蠶之號劣

登三品之名祇將申任土之宜豈足備補天之用輕
微既甚隕越何安其正段物色謹差節度散兵馬使
王審球等押領隨狀奉進謹進

賀入蠻使迴狀

右得進奏院狀報入南蠻通和使劉光裕等迴雲
南通和兼進獻國信金銀器物正段香藥信馬等漢
使傳詔則星迴象林蒙王奉琛則雲集龍闕能舉羈
縻之術果懷倔强之心若非聖上德叶棄瑕化敷柔
遠則何以感鑠耳鏤身之眾啟臙肝瀝膽之誠彼越
雉呈祥未爲盛觀旅獒入貢徒見良箴曷若正在艱

時能安獷俗使雲南酋長再遵奉贄之儀天下賢良
免獻征蠻之策斯皆相公魏絳陳利王商振威已今
六詔歸投卽使八紘清謐某比者南尋銅柱西鎮劍
關曾施上將之謀免辱大君之命今則遠聆盛事倍
切歡心陳賀末由無任欣抃云云

賀殺黃巢賊徒狀

右得進奏院狀報定難軍拓跋相公保大軍東方達
尚書奏於宜君縣南殺戮賊徒并生擒賊將又鳳翔
李相公奏探知京中賊徒潰散六月十三日聖上御
宣政殿排仗受賀者竊以逆賊黃巢稔惡既多就刑

非久敢駢烏合之眾屢拒鷹揚之師拓跋相公東方
尚書或力微裔孫或曼倩餘慶皆申祕略共殄克徒
能順天誅遂陳月捷軍名定難雅稱關張之聲縣號
宜君克符堯舜之德是以聖上高臨紫極遠耀皇威
睹百辟之歡呼雷驚蜀國想六師之勇戰電掃秦川
卽當靜滅氛霾永見均施渥澤此皆相公調鼎中之
味運堂上之兵右援枹而得功左執律而至獻勳功
相繼稱慶何窮某久阻淮夷尚淹海徼遠聆捷語但
切歡聲然必願劔拂狼星旗迎聖日終繼張飛之拒
後不慙聶叔之致師限守戎藩未由陳賀下情無任

踴躍之至謹奉狀陳賀謹錄狀上

賀收復京城狀

右得河中節度使王司空牒報四月十日當道與鴈
門節度使李僕射及都監楊驃騎下諸道馬軍齊入
京城與賊軍交戰約殺賊步軍一萬餘人其馬軍賊
便走出城黃巢亦未知存亡其逃遁賊徒尋差兵馬
追奔並已收復京闕訖者伏以逆賊黃巢藏姦匿暴
惡積禍盈久於輦下偷生固是檻中待死楊驃騎受
聖君之重寄李僕射傳飛將之雄名旣無慮於二心
果有成於一力想其霜鋒電擊月羽風馳壓雀卵之

威高燎鴻毛之勢猛遂使賊巢困不能鬪亂無所歸
雖爲漏網之鱗已是傷弓之翼則期加顯戮永掃羣
寇加以能據六宮豕豕九陌今茲克復免致焚燒佇
望翠華便歸丹闕稍豁上天之怒實除下土之灾此
皆相公靜運廟謀遠揚戎略旣叶一匡之妙道北極
何憂將流萬古之美談東封可俟某登壇有忝伏鉞
無功遠聽歡聲始除慙色限拘守鎮陳賀末由下情
無任抃躍之至謹錄狀上

賀月蝕德音狀

右伏見六月二十六日德音以太陰薄蝕曲赦三川

管內囚徒及委諸鎮收拾埋瘞京畿四面暴露骸骨
者伏以金精隱耀玉辰垂仁蒼天誠以震驚省風謠
而欽恤圜扉宥罪掃彗銷冤近鄙北齊號御囚而肆
虐遠遵西伯葬枯骨以施恩蜀山之草木先春秦甸
之煙塵永息此皆相公功成燮理道洽變通助日月
之光輝振雲雷之號令八方翹首萬彙歡心某跡繫
戎旃心馳台室阻隨班列莫遂歡呼下情無任抃躍
之至謹奉狀陳賀謹錄狀上

賀內宴仍給百官料錢狀

右得進奏院狀報七月一日於內殿宴百官仍令度

支各給三箇月料錢并奉勅旨迴駕之日應沿路州縣切不得輒進歌樂及屠殺者伏以聖上繼周匡業避狄興憂自幸成都彌資儉德守玄元之三寶達舜帝之四聰徹彼珍肴掛其素服言唯罪已事不勞人今日已復上京將迴大駕致柏梁之高宴盡醉千鍾鄙鍊布之乏財均頒九府然後繼飛綸翰仍命繡衣制郡邑之嚴科節道途之浮費既施令於好生惡殺亦停歡於八列九成王化斯行物情皆泰此皆相公手攜多士躬賀聖君駕行賦在鎬之章鳳藻詠濟汾之樂一時盛事萬代美談某限守藩條阻攀仙仗心

馳蜀棧目斷堯樽下情無任抃躍之至謹奉狀陳賀
謹錄狀上

請降詔旨指喻兩浙狀

右先准浙西周相公牒杭州與浙東兵士鬪敵某遂具事由申奏請降詔書速令戢斂伏奉二月二十日詔旨已詔兩浙務在叶和者某當時備錄王言各移公牒訖兼先差人賫書牒與劉漢宏尙書詰彼起戎之本諭其繼好之規今得迴書其言不讓唯稱周相公與董昌苟恃寵榮妄行威福虐侵近境阻截通津況有不同國之讎嫌又失無蘊年之誓約必想見豺

而戰猶能首鼠幸生已決加兵終期釋憾然則此無和氣彼有鬪心嘗膽者結怨旣深抉眼者遺言可驗必恐以吳與越終當有越無吳實所謂夫差之麋鹿興譏范蠡之鼃鼃得便唯憂黎庶枉見殺傷輒再具狀奏陳請更飛詔止遏某徒圓鑿方枘避柱觸楹累陳高鳳之詞莫解子都之怒且讎因手足疾在腹心久練師徒決期戰伐則也衛絲轉亂鄭蔓難除三人是仇百姓何罪伏惟相公贊成睿略施展廟謀俾陳兩武之事端唯仰一言之恩庇謹錄狀上

謝加侍中兼實封狀

右得進奏院狀報伏奉十一月十一日恩制加授侍中仍加食實封一百戶者伏以某材輪美箭業紹良弓早勤式遏之規敢怠聿修之訓遂得一分戎闡七換師壇提漢法之重權陟秦官之極品恩榮獨盛績効何申況自蠆尾之徒蝟毛而起神州傾陷御輦巡遊不能踴躍用兵有類遷延之役雖進退惟命不敢爭功而行藏相時豈無懷愧而又積山煮海瓜剖豆分莫成贍國之權徒竊經邦之位唯甘廢棄永見沈淪敢期渥澤之無私俯念涓埃之有效許登玉署高戴金璫仍忝眞封式加懋賞且如講能奪席諫切引

卷三十六
九
裾方升鸞渚之榮俾稱鳳池之望豈伊孱劣所可貪
叨此皆相公仰贊萬機俯安九牧無使怨乎不以能
令可者與之唯當三命益恭一辭無退入則撫安疆
圉出則誓掃氛孽仁成滅寇之功冀贖曠官之責戎
鎮有限不獲陳謝下情無任感恩兢懼之至謹奉狀
陳謝謹錄狀上

謝落諸道鹽鐵使加侍中兼實封狀

右某伏奉去年十二月十一日恩制加授侍中餘並
如故仍加食實封一百戶落諸道鹽鐵使者伏以君
親委任固能捨短從長臣子忘勤唯願從微至著某

一司推課六換暄涼正逢多事之秋莫展牢籠之用
況自頻更統帥別致租庸既當狐讓干皮實見羊分
九牧贍軍富國固絕籌謀熬海鎔山幾隳條貫今者
聖上恕其不逮察以無私將漢法之重權委儒流之
妙術豈料更留宸慮猶念戎勳許登負璽之班資不
替擁旄之寵寄尙假極品重增實封當主憂臣辱之
時若斯榮盛審福過灾生之理何以遑安此皆相公
曲庇庸虛全忘僭忝俾息躬於負重當銳志於專征
宵無淬礪之功仰荅陶鈞之賜此外以榮爲懼至未
如初下情無任感戴兢惕之至謹奉狀陳謝云云

謝弟祝再除縣州狀

右件官是某堂弟今得進奏院狀報奉某月某日恩制除金吾將軍被本州官吏眾狀舉留續准勅旨依前充縣州刺史某嘗讀後漢書見寇恂爲潁川守後拜金吾從上經過潁川郡人遮道願借寇君乃留一年以慰百姓此實國家殊寵郡邑美譚萬代之來一人而已誰知盛事得屬鄙宗安貧恤孤潁川之政化雖乏出官入仕子翼之官資略同感深而喜作悲端效淺而榮爲懼本伏以高祝粗閑吏術忝荷君恩分憂而地壓劍關理俗而塵銷鈴閣今者纔升緹騎卻

擁朱輪謂施撫茸之能特徇眾多之請此皆相公愛忘其短仁及於微仰贊帝俞俯從羣願某唯知提訓俾愼揣摩同驅軾下之熊但期靜理雖睹堂前之鸞免恨分飛限守戎藩末由陳謝云云

請轉官從事狀

某官薛礪

右件官閔損登科良由德行陳琳從職實假詞華林幽而轉識芝蘭木落而方知松桂深敦操尙夙著榦能遠叨分闡之榮唯籍運籌之妙伏請轉官仍改章服轉充觀察判官

某官鄭倅

右件官早登上第久佐大藩能修檢慎之規每助撫
綏之政賓筵所重健筆爲先伏請轉官仍賜章服轉
充節度掌書記

某官顧雲

前件官東筠孕美南桂抽芳曳謝眺之長裾從衛青
之軍幕五殺皮之爲重豈謂虛譚百鷲鳥之不如方
知實事良資妙畫共展壯圖伏請轉官仍賜章服充
觀察支使 以前件狀如前伏以某遠率舟師誓除
國賊征帆則雲掛行色戰鼓則雷含殺聲留務旣繁

良籌是托或倚幕中之婉婉或求馬上之翩翩輒具
薦論仰希甄獎不拘月限別覬天恩伏惟相公庇護
戎藩激揚賓席稍超常例特受清資略假潤於丹青
許分榮於朱紫所冀元戎十乘速成討罰之功越府
三才各得施張之處已具狀申奏訖云云

滑州都統王令公

以下別紙

伏見制書伏承榮加內史之任暫執元戎之權往鎮
雄藩誓殲窮寇仁復宮闕則歸廟堂九重之倚賴如
山八表之歡呼動地而況令公志勤捧日力瞻補天
三秉台衡兩分戎律入則建蕭何之功業出則振黃

霸之恩威此皆羣議稱揚不假拙辭贊詠今者聖上以叛徒乘便尙敢俯張諸道徵師互相逗撓蠢彼之姦宛未弭赫斯之憤怒良深遂輟股肱遠資心膂薦敖宰楚設前茅後勁之規管仲相齊致九合一匡之譽是以榮轉西臺左相請爲東道主人儒武全材古今罕遇伏想近承睿略嚴令諸侯誠知白馬封疆幸而獲賴必料蒼鵝羣黨困不能飛卽當立刻梟巢去迎鑾駕海晏而永興龍德池清而再睹鳳儀凡在含靈皆增係望某靜思奮擊動見悔尤四鄰多是異心十道竟誰同力今所以自賀者得逢知己親總貞師

巧脣無所搆之端壯膽有可傾之處唯冀遙稟大將軍之命用勵驍雄仰憑眞宰相之威永除妖孽末由陳賀下情不任欣慰瞻攀虔祝云云

第二

伏睹制書伏承榮膺寵命正鎮雄藩伏惟感慰竊以動惟佐聖靜乃優賢百穀垂成則暫停霖雨八紘向泰則貴息兵戈詎勞有道之人久練不祥之器羣情旣鬱帝命斯行令公獨竭忠誠克扶厄運當六師扈從司南之制度無虧及十乘啟行逐北之威稜有裕但屬王事靡盬人心不同祖豫州志在誓江佗申壯

節蕭相國力謀佐漢或致游詞今以小寇必殲大臣
于役慮失華夷之望倍興宵旰之憂遂乃鳳紙傳恩
遠離西蜀蜂旗卷影卻到南燕指縱旣稟於成謀搏
噬佇看於眾旅坐駢十道臥理百城顯爲出入之寵
榮保就始終之勳業某夙銜深獎繼奉好音覽古人
賀滿之言睹君子持盈之節抃慰攀戀不任下情伏
惟云云

第三

伏承旌幢已到鎮上訖伏惟感慰令公手傾霖雨身
耀福星三入廟堂已超仲父一匡寰宇更屬何人昨

者十乘啟行九重軫慮以爲瑩不勞海灌卯何假山
摧遂請元臣卻臨重鎮今則徐迴龍節靜撫雄師下
車而恩澤均沾舉扇而仁風廣振南燕受賜北極紆
憂某早荷獎知倍增欣慰云云

鄭畋相公

伏見二月六日制書伏承相公正居宏父光弼聖君
兼總蘭臺再調梅鼎凡云遠者近者莫不舞之蹈之
伏以相公碩德茂勳雄才奧學播在四方之口沃於
萬乘之心固絕贊揚但增瞻仰況自關中聚寇岐下
屯兵率先諸侯累展奇略是才趨鳳輦便陟鸞臺

遠涉山川行就九天之寵克平水土坐升百日之榮
竹宮旣託於清規芸館更歸於雅望則乃孫叔敖之
慎守愈貴愈恭胡伯始之累遷有倫有要永憑上德
伋賀中興使仲父執鞭鄮侯捧轡驅蠶動入華胥之
域格蠻夷歸虞舜之風某早沐深知遠聆殊拜末由
陳賀抃聳倍深云云

第二

伏承太保相公累陳章表懇讓鈞衡暫輟任於股肱
果優賢於羽翼緇衣纘美青綬加榮守難進易退之
規叶居安慮危之道莫不宸展欽矚搢紳詠歌而況

相公比者統冠甸侯深攻國賊唱義聲而飛羽檄管
爵賞而練甲兵方驅破浪之風伋滅燎原之火而乃
腹心有疾牙爪無功何君子之見欺實小人之難養
然而災爲福始小往大來再秉洪鈞遠安仙蹕調鼎
中之實味運堂上之奇謀決勝漢籌弭災魏闕皆憑
蕭丞相指蹤之力豈假鮑尙書統集之兵咸推第一
之功能贊登三之業今則奉身有裕正足無虧將尋
疏傳之高蹤乃訪留侯之故事用黃石公之妙略蔚
爲帝師從赤松子之勝遊別作仙侶雖云獨樂其柰
眾情氛噎餘妖方願靜銷於天下陶鎔重望豈宜久

滯於山中必計才返鸞旌請歸鳳闕永使蜩螳罷噪
仍令鹿馬分形深荷眷私況聯親懿依攀禱望可鹽
遠誠拜賀末由悚戀增切云云

史館蕭邁相公

昨睹制書恭承高辭大計正陟中台兼升史館之榮
實副儒門之望竊以冊書所重筆削爲難別成一代
之楷模夔掩百王之規矩是得宸衷妙選朝列具瞻
而況相公眞君子儒老成人德允釐百揆顯贊萬機
今者邦計旣豐國經斯整東西臺之極位揚歷無遺
左右史之直言裁成有類莫不動華表德游夏緘詞

能施補袞之功備載垂衣之化必使襄眞貶僞彰發
傳之體有三激濁揚清勵事君之心無二古今盛美
遐邇欽依某遠守藩維忝資陶冶每慎六條之理敢
希一字之褒并獻所多啟陳無及伏惟俯賜念察

度支裴徹相公

伏睹除書伏承相公再履台席榮均賦輿凡在生靈
莫非欣躍某今之所賀者眞以天上之福與大國之
幸不欲更牽俗禮強飾繁詞然而歡心有餘祝史無
愧敢陳贊詠冀豁懇誠伏以相公德襲清通道資恭
儉歷遊華貫高陟台衡當聖君巡幸之初見賢相燮

諸之業而乃鴿原陷難鳳閣辭榮暫屈跡於外藩尋
秉權於大計今者天將悔禍日待升平果請英才卻
歸舊位躡周司馬統兵之秩騁晉尚書較運之謀四
方所傳一意相賀某每慙薄伎偏荷殊私再逢調鼎
之期實切彈冠之望未由陳賀但增攀戀聳抃之至
云云

租庸王徽相公

伏睹制書伏承榮膺寵命伏惟感慰伏以萬乘巡遊
最難留事百官毗倚允屬持綱況當返駕之時尤重
清宮之禮膺茲寵寄實在賢能司空相公靜抱長材

動施餘刃報主安人之業早冠鼎司東姦艾弊之名
已諧輿論今者鳴鳩命氏鷹隼揚威內清輦轂之塵
外肅關畿之地聖君新命永託中庸司隸舊章佇觀
大禮某忝承眷獎欣抃實深云云

前太原鄭從讜尚書

得河中王相國書報伏承相公榮膺寵命將赴京國
伏惟感慰伏以宸遊既遠居守是難須倚元臣方安
聖慮是故昔漢帝曰吾與僕射何異則知重寄別表
顯恩而況相公岳立儒宗川流相業頃辭鳳閣遠耀
龍旌郭伋示信之鄉廣沾恩化周舉移書之地遍活

卷三十一
疲羸肅軍令於貔貅振兵威於獯豸求安邊境胡雛
不敢南侵遽值妖氛周馭久勞西狩今以玉京雖復
鑿輅未迴輟戎略於藩垣託繁機於宮闕必計中和
樂職已繼雅音司隸舊章卽興盛禮然後重調梅鼎
永對莫階贊成天下之春固是穀中之事凡云品彙
莫不欣歡某早忝恩知倍增抃慰末由陳賀但切依
攀云云

禮部夏侯潭侍郎

伏承榮膺寵命伏惟感慰侍郎泰初朗鑒日月難踰
孝若美資風塵莫染儒室別開其戶牖相門必繼其

弓裘是以始於憲府宣威便見儀曹主貢履歷而皆
遵仙路操持而永振貞風栢列朝霜昨日揖登臺御
史桂開夜月今朝選入室生徒採珠而蓬島待空搜
玉而藍峰寡色副天下正人之願望息場中藝士之
屈聲某早沐眷私不任欣抃云云

吏部裴瓚尙書

伏承榮膺寵命伏惟感慰竊以勳華聖代唯務舉能
郭泰賢流共推取實用捨旣歸於重柄古今皆託於
長材人望所諧主恩斯在尙書情疎宦路性悅道風
月高而霜鶴數聲雲卷而蓮峯萬仞早知厄運久避

卷三十一
翳氛洋川之瑞草仙花幾牽蝶夢閭苑之朝嵐暮靄
深澗豹姿然而陶鈞難住於山中塗炭待平於天下
遂辭肥遁來謁宸遊果登銓管之司允洽簪纓之望
昔年掌貢搜海嶽以皆空今日掄材酌淄澠而不混
清通所蒞淆亂必除厯居六郡之峻資終補三台之
缺位遠祈邇禱匪夕伊朝某早仰仙標遙欽懿範抃
慰瞻望不任下情云云

第二

伏以禮稱選士實資秀孝之科書貴知人允屬銓衡
之職君命既將厯試物情固得僉諧而況侍郎雲鶴

性情天驥行止瓌窻近日高批帝語於筆端絳帳生
風妙選羣才於門下洎湖湘察俗溷洛尹都便宜入
秉化權坐匡聖略直以手能持滿心切避榮唯求勇
退之謀久阻急徵之詔萬乘夢思於隱霧四方渴望
於爲霖今者移黜陟之司託清通之鑒何假山濤之
密啟能遵李重之良箴永期涇渭分流必使輪轅適
用某每思玉昆金季皆辱眷知松茂竹苞深敦交契
禱祝瞻戀並同眾誠伏惟云云

宣歙裴虔餘尙書

伏承榮奉徵詔將赴闕庭伏惟感慶兼極今者妖氛

向息聖運重興諸葛亮之用兵已非急務叔孫通之制禮方籍賢才以尚書望積臯夔政成宛旬三年察俗以仁義爲先四境懷恩俾寇戎之戢是得傳巖結夢宣室飛書黎庶傾心莫遂攀轅之懇君王聳耳待聽曳履之聲況乃親侍安輿榮趨帝輦仁聆調鼎永使建橐豈獨關中又安實爲天下幸甚某久鄰仁境深飽德風抃慰瞻攀不任誠懇云云

第二

特垂手筆榮函兼示陳情表藁捧尋無斃欣賀有餘且近者時風僅訛孝道多缺事親則薄奉已爲先只

將奔競榮身不以違離介意今睹尚書遠辭徵詔懇致奏章敘向來爲國分憂不矜茂績請從此於家就養實稟格言況尚書若赴行朝必登相位而乃不親梅鼎願奉板輿是逃台袞之榮唯戀斑衣之樂永使李密之表萬古齊名仍令束皙之詩千秋長價有以見聿修令問橫勳時流豈唯上德之美譚實乃中興之盛事拜賀末由但切攀依之至云云

鹽鐵李都相公

伏承榮膺寵命兼掌漕運伏惟感慰伏以鑄山熬海旣標富國之權紫帳皂襜固是安邦之彥況從多事

諒託全才相公中庸日彰大任天降舟楫暫妨於援
溺棟梁必俟於扶危今者三年禮成萬乘恩至假途
端揆正位司元憑孔僅之智謀繼齊桓之霸業必也
廣施奇計遍致豐資荅上帝之殊恩振中興之盛事
凡云品彙孰不欣歡某每慙糠粃居前久阻鹽梅入
用主張多失固難稱老成人交代叨榮無以告新令
尹抃慰競惕不任下情拜賀末由攀戀空切云云

第二

每辱榮緘卽垂虛譽周顛齊名於樂廣固是懷慙韓
非接傳於老聃實爲過望荷戴增切兢惶益深伏以

相公宋劍倚天魯戈駐日再居重任大洽羣情必計
海若傾心廣潤煎熬之利山靈効力助成鎔鑄之功
便令流馬飛牛終得踰于越萬國用則立期饒美廟
謨則坐致昇平勤王之誠在我而已伏惟遵護用慰
禱祠其他下誠已具前狀云云

主人此時也歡聲則風振儒林喜氣則雲鋪筆陣有
口皆賀無心不歸蓬島靈珠想離領下荆山瑞玉待
入掌中而屬鶯谷藏春鳳城陷寇不見孔門盛事唯
傷魏闕餘灾今者遠從行朝久臨憲府既躡清資於
侍極榮升重位於肅機傳咸之畏慎無虧鄭晉之矜
莊有裕正當今日必繼芳塵給事避地經時陟崗勞
念今聆美拜稍慰遠思然每於絳帳馳心共懷遺恨
須到洪鈞入手方洽羣情高接鴈行伫迎鳳詔虔禱
瞻戀無以披陳云

壁州鄭疑續尚書

伏承自小司馬假大宗伯出刺始寧伏惟慶慰竊以
進有致君之志共託阿衡仕無擇祿之言常聆季路
綽然遺範宛若合符尚書玉樹一枝金山萬仞雅望
全騰於入海華資緩步於五雲漢丞相之傳經永光
儒室周司徒之善職固屬高門况乃於國於家曰忠
曰孝比者黃巾犯闕翠輦省方尚書暫別鯉庭遠趨
鳳宸高提夢筆仰贊宸猷稟大聖之指歸立中朝之
張本此實爲人臣之忠於國也今以聖主優賢嚴君
遜位尚書固辭武部峻陟儀曹榮掛萊衣俾歌廉袴
毛義之喜難自己胡威之清必眾知又爲人子之孝

於家也莫不事標雙美譽冠一時今彼郡而昔彼州
豈能較盛出傳舍而入官舍未足齊榮仁見風扇揚
名雲屏隔位隼旗高建免勞陟岵之詩龍鼎待調卽
展濟川之業某早銜眷獎常切禱祠拜賀未期瞻攀
無極云云

泗州鄭庾常侍

伏承已到貴鎮上訖伏惟感慰昔鄭弘爲臨淮太守
熊初架軾鹿乃挾輶旣傳一郡之政聲終陟三公之
寵秩果符瑞應永振美譚今則常侍族茂山東威臨
泗上實繼巨君之芳跡足分聖主之遠憂況乃沛帥

戢兵淮民復業懸一城之愛日振四境之和風羣情
允諧新命非遠某近封斯接殊眷先垂抃慰瞻攀但
切誠抱云云

湖州杜孺休常侍

昨睹除書伏承榮膺寵命再理吳興伏惟感慰常侍
比臨雪水大振袁風適聆高握新蘭又見重分舊竹
實謂政聲日洽人欲天從徵黃太守之書却隨鳳去
借寇使君之眾迎得春來自此煙封茗畦月挂蘋渚
不詠洞庭歸客卽吟金谷主人再樂三年終蘇一境
然後入居青瑣坐演紫泥福庶品而旣多掌陶鈞而

不晚某早銜殊眷并慰實深拜賀未由瞻馳倍切云

泗州于濤常侍

常待榮戴貂冠遠馭熊軾能施善政遍恤疲氓暫牧
雄州已安樂國斯乃鄭巨君之甘雨再潤淮邊卜子
夏之儒風重興泗上況屬彭門叛亂仍當汴路艱難
獨守危城終摧敵壘果成茂績實驗全才且羣師悅
挾纊之心鄰孽縮吞舟之口仁者有勇信非虛譚某
昨奉詔書許令軍賞設爵而唯憑帝命舉賢而實契
私誠今則寵換銀璫威兼鐵柱敬申厚禮用報殊功

楚岸風聲處處而既傳滅寇隋堤柳色年年而祇望
行春拜賀未期瞻思頗切某公牒同封送上云云

西川陳敬瑄相公

伏睹除書伏承相公以祝鳩之榮兼大貂之貴禮登
八命寵冠三台伏惟感慶兼極伏以掌邦教之司無
人則闕負國璽之任有德始居昔丁固休徵終叶生
松之夢戴憑奧學曾標奪席之名然十八年而既居
後時五十重而何益於事曷若相公雄臨玉壘榮奉
金輿昔也坐振風謠作一方之慈父今乃立迎天寵
為萬乘之主人使西夷免怨於後子南詔永知於戀

聖是以秩歸鳳闕化洽龜城躡高蹤於黃闥紫扉耀
偉質於朱衣皓帶豈獨一時之盛事實為萬代之美
譚某早沐眷知不任欣抃云云

徐州時溥司空

竊以誓於晉乘則重其執贄往來諷以楚詞則愧彼
隨波上下永言有義有禮唯在知和而和況乃仁境
接邦之彥兮善鄰存國之寶也始終相契今古何殊
去春特辱長牋兼貽厚幣使者乃和門上校賦之以
華棧大宛引夏殷罪已之言鋪陳數幅舉邾魯息民
之義撫綏近封有以見真男子之用心古諸侯之行

事其於景仰豈可弭忘今遣專人聊馳微信匪足為
報永以為好伏惟照察

第二

司空利器倚天忠誠貫日授律而舉無遺策訓戎而
動有成功昨者窮寇警奔銳師薄伐審麟史追逃之
勢展豹篇決勝之機靜刻羣凶暗梟戎首范丹縣側
雷威騰肅殺之聲季氏山邊天罰示告成之慶久留
盛績終屬雄才所謂有非常之人然後有非常之事
絳灌亦一時俊傑關張非累世勲庸鏤姓名於金鼎
玉鍾飾儀形於雲臺煙閣永言盡美孰敢爭先某幸

接德鄰深遵義路每增欣賀固異等倫云云

第三

特辱長牋俯傳大捷誘賊將而暗除梟帥剗羣凶而
遍戢豺聲夫何壯哉誠可畏也且黃巢謂逃天得計
乃揆日偷生書罪則竹乏南山流惡則浪乾東海逞
暴於鋸牙鈎爪挺災於金闕玉京煙氛所侵塗炭皆
匝諸道遞相逗撓別自俯張驅兵而未暇舉旗喪律
而先聆返旆養姦既久翫寇何安若非司空以當春
滋雨露之恩則坐迎龍節及初夏順雷霆之怒則立
展豹韜遂得纔發銳師果殲窮寇刷國家之積憤弭

州縣之餘殃所謂三年不飛終當一戰而霸況可飲
頭而快意何須擢髮以論幸有以見報聖天子之恩
固須待舉真將軍之令幸聯仁境先聽好音欣抃欽
矚翰墨何寄云云

諸葛爽相公

伏承親提師旅遠赴戰征跋履山川蒙犯霜露不審
近日尊體何似急景凋年寒威肅物令行麾下盡忘
戰瘡之傷望峻寰中將救瘡痍之患必有百靈薦祉
七萃成功遠揚卻元帥之高名近繼郭汾陽之雄略
則銷氛稜遍活烝黎有心之徒引領而望伏惟每加

保重早副禱祈遠誠所望云云

第二

訪聆賊巢自逃商嶺久徧許田蔡師相連狂鋒尙熾
當使以道途遠隔行止難知未施擒鹿之能但養斬
蛟之勇伏承相公親麾八陣深運六韜將靜掃其羣
凶已齊驅其銳旅既見三冬擐甲卽致殊功方知五
月渡瀘誠爲易事諸道固當高枕聖君便可迴鑾而
未測鯨奔須防獸搏凡居戎閩合審軍機輒遣專人
遠偵賊勢幸垂示及冀助討除伏惟照鑒謹狀

湖南閔頊尙書

親故前河西朱大夫到遠垂書示深荷眷私兼將尙
書弄馬圖及貴府祥瑞事跡相示閱覽忘倦欣仰有
餘且武藝所稱歷朝可數楚誇徹札魯銜蒙輪彎三
百斤之長弓嘗傳漢史掉八十斤之雙戟亦著魏書
然而唯守一隅莫能四達長於射而短於御力甚壯
而心甚怯永言戎伎難遇全才今者尙書術繼白猿
名高赤兔旣占萬人之敵眞爲一代之雄雖居仗鉞
之榮不忘據鞍之勇爰徵粉繪妙寫風儀遍覽左旋
右抽唯知目駭神聳彼繫繩逞捷運臂服勤實謂區
區瑣瑣者爾況乃夢符捧日政治觀風花竹呈祥果

驗中興之運龜龍薦感皆標上瑞之姿若非望重行
春歌喧來暮則何以三軍效勇永諧欽化之名七郡
懷恩盡表殊常之應必期渥澤繼入瀟湘此則但睹
其電擊雲飛鷹麟鶚視每勞企想無以喻言唯望慎
舉政條仰酬寵寄方值四郊多壘實憑萬里長城其
他中心藏之永以爲好幸垂諒察云云

幽州李可舉大王

不審自履初夏尊體動止何如伏想趙盾日威雄臨
北塞袁宏風化遙助南薰固當九郡懷恩百靈薦祉
符提白玉儼標萬里之長城臺築黃金遍啟四方之

賢路豈止應掛絲之夢自然超衣錦之榮伏惟精慎
寢興別迎寵冊永扶昌運大洽羣情今遣諸葛果卿
假以郵巡修聘旣愧未成好幣又慮或失良材無限
遠誠各具別狀云云

第二

雲龍在想風馬異區末由傾蓋之誠空切著鞭之望
雖傳鱗翼莫寫肺肝况某俯顧家門忝同里閭每詠
維城之什卽懷喬木之恩幸蒙侍中大王不賤家上
深知國產曲垂厚獎頻辱好音然則苟能知心何假
會面以斯佩荷可鑒依攀今緣國患未除鄰讐不戢

甚欲慎言結舌其如憤氣填胸略假牋毫具陳事實恃惠子之知我望明王之鑒賢伏惟恩私遠察誠素云云

第三

伏以蜂蟻巢窠猶能稔惡熊羆隊伍未見摧凶在於義士忠臣莫不痛心疾首某蓋謂去年奉詔遂於近境旋師然今若終不自行必恐竟無所就已從中夏遍閱大軍待剡淮戎卽登汴道但以指其百勝決此一行人不異心事希同力侍中大王族榮周姓爵貴漢封固多報國之誠常貯安邦之術見茲禍難忍不

憂勤某旣事征行輒申控告伏望差借兵士助平寇戎得貴藩精騎五千勝諸道羸師十萬仡收京闕尅在旬時亦已先具奏陳所貴免成專輒申包胥之告急與此雖殊趙充國之請行于今可試幸垂亮察必賜允從不敢獨擅茂勳所冀均分重賞忠誠之切實在於斯伏惟永存始終早示可否未間顛望可想眷翹云云

第四

別奉榮緘遠搜古籍其於降歎無以喻陳且近者列士諸侯盈庭多士唯以宦塗銳志少於儒術留心而

乃侍中大王博古通今去華取實燕碣石之接土已
繼芳蹤漢維城之好書遠符仁旨是以訪遺編於汲
冢尋墜簡於魯宮然則荆軻易水之歌徒矜壯氣召
伯甘棠之詠虛播政聲豈若博采聖人之書用光君
子之道但懷鑽仰敢覲切磋況某久擁戎旃難親講
席耽讀闕五千卷之數藏貯無三十車之多自奉指
蹤願申誠懇遍令列肆廣集異書冀資日益之功寧
憚風詠之過必可徵名東觀承乏西齋伏惟俯賜鑒
察云云

滑臺王令公

某蒙恩忝官不任感懼某粗傳堂構謬荷國恩然而
術略素貧勳勞甚淺早分相印累陟師壇每遇福過
災生蓋爲材微任重一自四郊多壘萬乘蒙塵未施
毫髮之功深負咽喉之寄羊皮狐腋空思趙簡子之
言瓦釜黃鐘甯免楚大夫之歎旣難展用唯願退閑
方欲瀝血拜章奉身請老豈料更隨眾例亦忝殊榮
遽登常伯之高資復益實封之異寵伐檀可懼橫草
何申伏緣遞路不通制書未到先垂榮問過辱獎詞
旣聆天上之音不愧月中之夢末由陳謝但切兢惶
云云

鹽鐵李都相公

某蒙恩忝官不任感懼伏以納言峻秩眞食殊榮有扶持社稷之功有燮理陰陽之術方居正位允洽羣情如某德乏潤身智慙周物況逢多事未展壯圖動無効於啟行靜有能於臥理加以久司筦貨實寡籌謀旣虧於富國贍軍深愧於木牛流馬唯甘黜削永遂優閑豈料聖澤無偏戎藩有忝翰飛畫鹿昔年而莫見休徵冠聳豐貂今日而愈慙非據仍加班邑何報聖朝此皆僕射每賜保持得榮交代唯期勵節共願匡時陳謝末由依攀益切云云

第二

竊以世途易變時事難言泛泛如水中自安滔滔者天下皆是雖董卓已燃巨腹眾切歡呼而桓彝若有忠魂潛應慟哭每窺師律空激壯圖今則大駕未旋外藩多難獲利者唯謀潤屋握兵者誰解清宮當道雖乏供須但勤貢獻願早迴於御輦難空倚於賦輿割占所因指搗斯在必希朗鑒深察鄙誠其他卽遣專人冀具後狀云云

龍州裴峴尙書

遠勞專介特枉華緘發函睹不滅之蹤滿幅示相憂

卷三十一
十一
之旨其於佩惠何以寄言且國步猶艱天心難測忠直者韜聲戢影姦邪者鼓舌簸唇彼旣一時此須三期歷試無限卑栖寵辱若驚周柱史非無意也行藏自保魯司寇有是言乎多謝故人勉報聖主分憂救瘼爲政非輕志操不虧恩榮斯在伏惟諒察云云

西川柳常侍

某頃鎮龜城別營雉堞蓋符天意得就土功今者幸遇巡遊謂申績効久留御輦俾立豐碑杜元凱方愧勳名李玄感敢言德政雖忝當功受賞其如見寵若

驚常侍直道而行樂人之善遠垂華翰過辱獎詞以永傳不朽之譚先見未來之事可使美掩蜀都之賦高齊劔閣之銘荷戴兢慙無以指喻伏惟照察云云

史館蕭邁相公

某日無勞効天降寵光雖雨露常均不辭潤物而丘山漸重莫遂安身况蒙相公察以獨立聖朝勤行直道迥垂芘蔭免使湮沉旣闢洪爐辱陶鎔之厚賜仍揮彩筆煩刻畫之妍詞以爲勳有成功前無強敵撫甯淮甸靜戢煙塵繼陳任土之儀遠瀝望雲之懇遂使榮升畫室特解牢盆更增班邑之恩尙假統兵之

位仰窺華翰俯揣凡材未能息多壘之灾何以竊長
城之譽唯期激勵少報生成拜賜未前懷仁益切云
云

三相公

某蒙恩忝官不任感懼伏以風后古官是聖代弼諧
所重國僑美賞非賢才負荷固難必也挺秀儒林鈞
深學海方可奪席占五十重之譽享秩稱二千石之
榮如某任重咽喉功微毫髮早提兵柄不能靜剗寇
戎久握利權無以廣資經費雖進退每從於帝命而
否臧實愧於軍謀以茲責躬無所逃罪但願罷歸林

藪絕望雲霄豈料宸襟猶傷墜履自上安下方慙畫
鹿之幡居高飲清忽戴附蟬之冕解煩難於平準增
寵祿於實封此皆相公啟導睿慈庇安戎律使貞金
鍊火免銷耗於毒煙直木摧霜更敷榮於聖日唯當
親驅銳旅遍討羣凶冀成破竹之功少贖伐檀之刺
末由陳謝悚惕增深云云

翰林侯詔學士

某材略素貧勤勞甚薄謬蒙睿渥累陟華資今者拜
以古官加之眞食伏蒙學士親奉宸睭過垂獎詞煩
郭璞之彩毫榮勝軒冕使夷吾之瑣器頓異斗筭遭

逢實契於百生銘鏤豈唯於一字但冀仰憑筆陣更
鍊戎韜充國壯心早遂征行之望無鹽陋質免慙刻
畫之恩荷戴兢惶不任誠懇未由拜賜但切依攀云

都統王令公

近者專馳賀狀伏計已覽卑誠久絕來音但多景戀
令公始終陶冶表裏經綸王商能止於訛言謝萬暫
提其勁卒奪窮寇姦凶之魄活疲毗震懾之魂行旣
順天捷當克日某比承詔旨久緩師期今伏見令公
命許君親身先將校幸叶彈冠之望倍警投袂之心

已閱全師旣離弊鎮雖自稱岸上之虎或謂當仁而
不畏水中之龍實歸重德唯期助役非敢貪功欲取
來月上旬決謀進退直衝宋野先會梁園謹遣專人
咨探行李輒覬迴信聊紓遠懷伏惟恩私深賜鑒察
云云

第二

累專寓狀粗得輪誠繼奉榮緘益銘殊眷不審近日
尊體何似夏星沒火秋瑄飄灰佗妖氣之雪銷想軍
聲之雷振伏計振振君子之德伉伉勇夫之誠足可
憑有慶之威誓無譁之眾功期一舉勢必萬全謝太

傅之智謀預知大捷鮑參軍之歌詠唯位中興伏惟
慎保節宣用諧時望某常銜曩顧況捧溫言朝禱暮
祈可量卑懇云云

第三

某自承令公親率銳師任殲窮寇便謀訓練欲赴戰
征願折豺牙仰瞻馬首履山川而犯霜露久決心期
擐甲胄而峙糗糧早成力辦不料徐戎忽聚費誓猶
陳未豁征途難通饋輦以此早申誠懇但切憂惶伏
想萬夫爭殲弩之先八表望建橐之令位見龍歸魏
闕却迎鳳舞荀池雖居喙息跛行盡解口祈心禱某

早窺偉量遙稟壯圖仰視旄頭漸覓奔藏之處俯看
屐齒唯懷斷折之虞恭竢捷音專申賀禮未前祝望
不暇啟陳云云

浙西周寶司空

昨奉緘翰兼寄示書碑樣眷私既深披閱無倦其於
榮抃無以喻陳某每念久握兵戎累移節制雖纘弓
裘之業未揚鐘鼎之勳况乃來暮歌稀行春化拙豈
期睿獎特采微勞許標不朽之規遠降非常之寵至
如仲尼儒術始流芳於沂水之湄元凱戰功方掛美
於峴山之頂愚實何効遂叨此榮司空念切憂忘事

諸響應猥垂恩力妙選書工所謂知臣者莫若聖君
成我者固須良友有始有卒念茲在茲彼雖未起雕
鑄此已先深銘鏤今者干戈務擁筆硯事疎不及別
請他人敬遵來命唯望早成刊勒實賴獎憐其碑詞
同封呈上云云

第二

錄溫者包藏異謀玷污立化螻蛄暫成聚窟鳴梟實
欲同巢誠謂天高可欺不知日遠能照果彰罪跡遂
舉刑書既絕慮於竊鉄俾成規於用鉞言堪自賀事
必相傳豈料司空染五色毫飛一函紙徵美詞於魯

史辱虛譽於劉賡列土除凶不負國章在手臨風拜
賜其如戎律拘身未啟素誠但銘殊貶

第三

揚示詔書仰窺聖旨伫攀高躅倍激壯懷司空寄綰
吳門瞰懸魏闕況奉臣哉之命必興王者之師但希
水簇舟舡幸遵舊俗山堆戈甲早振雄威副大君肝
食之勤慰下走朝飢之望某祇看風信便泛江程五
兩翩翩解指朝天之路三軍踴躍待申破竹之功許
接後塵遠示行日儻可從心所欲必希攜手同行王
導有言無作楚囚相對劉琨養勇以誅逆虜爲期事

可榮今功何讓古既銜帝語勿老師徒願因江漢之
征得遂瀟湘之遇云云

第四

伏以山岳降靈尹吉甫之全德風雷奮氣竇世寧之
異祥況乃景值新秋時當聖代間生英傑高建勳庸
伏惟相公名可掩瑜志堪奪璧魏公子春霆振響有
物皆驚晉大夫冬日流輝無人不愛深蘊安劉之業
終成佐漢之謀今則又慶生辰永資景福出握元戎
之柄既播嘉聲入持宰相之權則迎急詔禱祝攀戀
不任下情有少續壽之儀謹具別狀寄獻云云

第五

專使押衙傅遜至啟閱華緘奉承珍貺光輝奪目荷
戴銘心況承已奉堯言永除回怒繼好息民之義遠
耀麟經輸忠報主之誠頻傳鴈訊喜氣連鋪於兩岸
嘉聲遍振於四鄰敬仰成規深敦曩契唯願內防蝎
譖外息狐疑必期戮力於公家不敢欺心於閭室伏
惟深賜云云

宣歙裴虔餘尚書

今月十六日裴校書至伏蒙深追曩顧迥黜違言損
之以榮賤辱之以好幣情敦刻畫無非譽過之詞事

繫環磨宛是愛忘之眷既多受賜永切銜私不審自
履閨秋尊體何似伏想蟬噪暮景鶴叫晴空樓下長
溪閱政聲而不息窗中遠岫引詩思以無窮伏惟侍
膳之餘公退之暇精加保愛伫俟寵徵某早願攀稽
近蒙善鄭深祝瞻望豈任下情云云

第二

去年因景氏子有小人言讒誣之事多興尊嗜之詞
不少動成忌器久阻親仁昨以戎首既摧禍胎自剖
遂脩舊好聊達微誠伏蒙尚書特請嘉賓遠賚厚幣
俾息四方之笑永通兩地之歡捧嘉貺而增榮窺雅

言而竊并况對蓮池之客實逢桂苑之仙自此句渚
清波已能流惡隋河遠派亦得洗瑕鍊多而既識金
精燒罷而共知玉冷伏惟仁鑒俯察愚衷云云

第三

當司宣歙院被浙西越局侵權差官奪務以強自恃
謂暴無傷仰計通仁備詳深弊今者離務却仍舊貫
已有詔書浙西雖近宋龔固殊魯瘠只解租庸副職
尚提招討兵符宜慙已往之非用結將來之好竊知
猶尋亂轍愈弄雄權再署周正罔思唐令宣歙院上
違聖旨下阻羣情實虧臣子之誠豈道鬼神之怒既

失用和爲貴唯知長惡不悛伏望尙書洞察事情俾
全理體雖知秦鏡固無遺鑒之虞或恐齊竽猶有濫
吹之咎能摧狡妄遠托威嚴亦慮官吏驚疑必望深
加撫恤幸甚

壁州鄭疑績尙書

賢尊相公不問庸虛早垂眷顧每念攀鴻之懇頻傳
繫鴈之書動皆陶侃之手蹤曾非陳遵之口占寶玩
而字終不滅何翅三年輝榮而恩有所從倍賢十部
況與尙書頌依鳳里已觀龍章清談深仰於阿戎異
禮得攀於侯昱高山仰止何日忘之今者遠辱榮緘

過垂虛譽永言抃荷但務鐫銘云云

第二

某素無材術謬荷寵章頃握兵權方舉上將軍之令
爰沾睿渥叨承大司馬之榮仰觀鳳書深慙豹略此
時未審尙書躡入花磚之影綴五色筆之詞刻畫恩
深游揚意重不護早申感激遠謝褒稱又奉華緘方
知麗藻雖早榮紙貴固無愧於士安而每想筆乾實
有慙於玄照旣多闕禮何贖深辜伏惟眷私終賜恕
察云云

太保相公鄭畋

自承相公大郎再持廟算大庇藩條况蒙特假陶鈞
正歸摧筦雖則魯爲長府仍舊貫之言行其如晉閱
被廬作新軍之意切未能措手每見移權凡所阻躓
自能審度遠垂批示倍荷恩私如愚者焉所獲多矣
敢速官謗有負親知伏惟鑒察謹狀

護軍郟公甫將軍

某用舍行藏唯遵帝命始終去就冀洽羣情仰酬萬
乘之知豈計一朝之忿昨者繼窺天旨更勵冰心遂
令專介傳書願得近鄰釋憾周相公似能遵稟免致
悔尤旣知遽瑛之非必息廉頗之怒一帶水永除多

梗九重天寶鑒忠誠自此日聆鷄犬之音風識馬牛
之性往來無壅彼此相成斯皆將軍遠贊睿慈旁均
和氣共成美事但荷深仁特辱芳緘過垂虛譽銘戴
慙惕豈任下情

第二

特垂寵示過辱獎詞竊知將校官寮三軍百姓共陳
眾狀請發奏章以爲煙塵自起於四郊塗炭遍加於
九野唯有斗牛之境稍無戎馬之灾此實地分所招
天心見庇蓋烝黎之福也何功力之有焉豈料將軍
過聽眾詞助成美事欲煩錄奏特賜傳言然以拙政

而誘羣情以虛言而干聖鑒固爲不可實所難當伏
祈終寢奏論俾速官謗便同受賜非敢矯言伏惟允
察云云

第三

特辱華緘猥傳吉語初驚善謔終荷深仁某每省庸
虛過沾寵寄未能報主豈至封王雖漢代諸侯亦流
恩於異姓而周書列爵須示賞於殊勳曾無剖竹之
聲詎有分茅之望旣非實譽必恐虛傳但慙眷私未
敢陳謝云云

前左省衛增常侍

忽奉榮緘特垂善謔宣父則欽遵三益老君則唯贈
一言仰銜成我之恩但抱起予之歎自常侍遠勞仙
騎俯顧弊藩竊承久陟道途倦垂軒蓋戀德而被雲
尚阻懷誠而啟露未期每憶笑談莫勝飢渴某也早
以勤行至道唯希翊贊聖朝張良正遇於漢恩敢言
絕跡范蠡未除其越恥詎欲逃名非求八百歲以成
春但讀五千言而勵節幸無大故且恕小瑕方願惠
然肯來豈將率尔而對云云

泗州于濤尚書

蠢彼徐戎聚茲餘燼敢侵貴境再逞姦謀只應來就

卷三十一
三
誅夷固可立期撲滅況尚書德超定國威跨粟磳妙
略防危實知孺子可教強隣結憾是表忠臣不私去
年旣振雄威今日更資茂績此已微驅眾旅救援仁
封永言牙爪之勤須託指蹤之妙願諧羣望暫屈長
才輒敢請充都指揮使仰俟一呼之命同成九拒之
功冀耀兵權早燔寇黨得脫齊桓之恥唯憑卻穀之
賢伏惟眷私深賜照察

第二

昨者竊聆有拔城之議遂申忠告冀保遠圖伏奉迴
緘得窺深旨且徐戎肆虐固非楚子之能泗俗懷忠

不比蕭人之性欲謀自潰何謂克終雖云有慮於防
川豈可潛思於坐井某近奉詔旨頗促軍期卽得經
過貴州便可剷除寇壘未見殷輪之苦且更勉旃其
於拔釜之言已承命也他具前狀此不繁陳云云

淮一弭國讐先資邦賦然其奈夜眠軍幕霜橫枕上
之戈曉掛戎衣雷吼匣中之劍終願親揚勇略靜滅
凶徒伏惟鑒察

鄂州崔紹大夫

遠蒙仁私特示表藁其於歎仰無以喻陳某夙練戎
韜願裨王略不愧於管天錐地猶勤於撮壤導涓遂
敢累貢忠誠冀迴聖鑒儻或六龍下峽豈同五馬渡
江中朝之禮樂無虧下武之功猷斯在果蒙大夫惠
於宗族贊以表章過垂華袞之褒益睹彩毫之妙古
詩云不惜歌者苦但傷知音稀今日知音幸遇之矣

然榮示中媿茂弘之德業齊越石之機謀自顧瑣才
何當虛譽今則王導清望已推於首座相公劉琨至
誠亦付於襄陽僕射必期英鑒永察愚衷云云

考功蔣泳郎中

特勞專介忽辱榮緘過垂軒冕之褒永寘巾箱之寶
實慙彼已豈敢當仁郎中學士暫避囍時偶勞僑跡
今者官清司績職峻集仙麟趾殿中久侍駿鸞之客
螭頭階上則親吐鳳之才豈唯舉四善之精詳蓋必
備九重之顧問鋪陳組纈演暢絲綸則也虞夏商周
之書重行聖代蕭曹魏邴之位更屬何人詎可守三

徑之寂寥慮千山之險阻許垂訪別專冀祇迎伏惟
眷私幸賜鑒察

前泗州鄭廉常侍

竊以寇戎未殄士卒多驕凡曰郡侯實難政理縱得
上和下睦猶爲朝是夕非況福乃儻來禍惟不測但
無慙於屋漏亦何累於國恩然而常侍蓋切奉公匪
疎撫士雖云驚擾終免侵傷有以見爲政無私當仁
有裕伏承已離泗水始及淮山捧閱來緘搗謙往咎
其於瞻仰胡可弭忘然則郡守懸魚旣繼古人之節
塞翁喪馬可寬達士之懷云云

新羅探候使樸仁範員外

忽奉公狀備睹忠誠慰愜欽依但增衷抱員外芳含
雞樹秀稟鼇山來登天上之金牌桂分高影去陟日
邊之粉署蘭吐餘香今者仰戀聖朝遠銜王命捧琛
執贄棧險航深能獻欸於表章欲致誠於官守雖無
奉使難在此時九州之侯伯傾心萬國之臣僚沮色
幸來弊鎮得接清規况奉貴國大王特致書信相問
將成美事不惜直言儻員外止到淮壖却歸海徼縱
得上陳有理其如外議難防無念東還決爲西笑聖
主方深倚望賢王位荷寵榮道路亦通舟舡無壅勿

移素志勉赴遠行峽中寇戎或聚或散此亦專令防
援必應免致驚憂且過鬱蒸可謀征邁館中有闕幸
垂示之所來探候事已令錄表申奏敬惟鑒察

蕭邁相公

某累貢表章請議巡幸忠誠屢罄宸睭未迴冀保始
終再陳利害匪望河陽之狩願迎汾水之遊竊以諸
道賦輿皆遵峽路多是僦五致一蓋已萬水千山後
網不繼前綱所貢不如所費況近者西從蜀國南至
荆門似有微灾恐遺巨患忽若草寇侵據江陵阻難
則榛梗既多苞茅莫入或更蠻戎伺隙必令越雋勞

兵避柱觸楹防微可誠行舟墜劍執滯固難某以孝
子不諛其親忠臣不諂其主遂陳狂瞽遠蹟聖聰唯
望略泛龍舟暫遷鳳里庶使九州修貢不愆任土之
宜四海歸仁盡遂朝天之望且賊巢凶狂聚眾穢黷
經時縱能早覆妖巢豈可便迴法駕淮南乃寰中久
富闡外名高喻以金甌永無釁缺比於玉壘實異繁
華伏惟相公居注意之朝處沃心之位周成王之卜
洛始託姬公晉元帝之渡江終資仲父早申決議仰
贊宸衷能成可久之規益表無私之德某頃在西川
制置及於南詔通和雖爲先察於微豈欲驟稱其伐

但緣相公皆垂目驗不敢面欺則今日荆蜀灾星未能退舍吳楚福地實可遷都事歸從權化資垂拱永定一家之理必輸萬里之誠某言不近誣志唯遠慮非奪日官之業冀乘天子之恩幸望國僑無譏裨竈謹已具表陳請訖伏惟云云

第二

伏以物忌太盛器滿必傾自古有言至今爲誠苟或不能知止但欲貪榮則有折鼎足之虞炊劍頭之險某每念遭逢聖運紹續舊勳北定羌戎南征蠻蠻東降齊盜西建蜀城高提三尺之權粗展四方之志然

自煙塵聚孽原野宿兵曾無敦閱之全材先叨統帥詎有縱橫之合策兼領利權而乃不能首唱義聲身先銳旅戮奔鯨於海澤逐獬犬於秦關遽及火熾祠篝火驚御輦遠聆巡幸便議征行但以每當誓眾之時卽奉止軍之詔雖自始終勵節其如進退失圖華元興城者之謳子產致國人之謗乃有浙侯構隙沛將加兵三年已來二憾不釋蝸蟻競噪蚌鷓相譏厚誣而巧弄舌端顯奏而亂搖心曲求刺舡而不暇想投杼以難逃伏賴相公照以秦臺調之伊鼎察邾公之愬鄭伯解晉帝之疑石苞免挂刑章尙縻寵秩旣

蒙明洗誠合淬磨更修克己之心永竭勤王之力直
以松筠不改雖自保於堅貞蒲柳先秋遽已傷於衰
暮筋骸漸憊志氣潛摧縱欲自強終憂不逮今者幸
遇上京已復大駕則迴麟闕龍吟固息興城之慮放
牛歸馬實迎偃武之期某也旣在清時誠爲棄物況
縈沉痼深負壯圖攬鏡無慘投簪是念豈慕祈奚請
老尚處冗員唯思范蠡愛閑得行素意乞解所職自
卜爲宜伏惟相公選士惟賢退人以禮俯矜羸劣特
賜允從雖慚未遂報恩免更久爲尸祿仰干陶冶敬
託賤毫始知調急聲哀唯愧詞窮理盡伏惟俯賜恩

鑒

田軍容

某慙無術略久竊寵榮提漢法之重權陟秦官之極
品莫申展効何贖貪叨况自寇盜奔侵京都陷覆久
守咽喉之寄不成毫髮之功雖兵柄旣多固難措手
而君恩未報實切覲顏况乃室怒潛興鄰讐競起陸
遜徒稱其佳吏崔暹終憾於癡人顯奏相誣多言可
畏幸蒙軍容推心底護極力保持雖遭貝錦之詞免
陷織羅之罪祇合以戀軒思幄榮蹇磨鈇畢命爲期
在公無倦但緣攝生罕妙從役久勤齒髮旣衰精神

亦耗少私寡欲敢言君子者乎多病愛閑方謂古人是也智力不可強進寵章不可濫行實覺妨賢只宜求退今者肅清鳳闕撲滅梟巢彀弓矢以銷兵永除戎備垂衣裳而致理廣任賢才如某者寒灰罷燃管井誰顧往歲之南征北伐雖忝當仁此時之尸祿素食逾慙非據既失行驅十乘豈能臥護六軍輒貢表章懇辭爵位伏惟軍容察以有犯無隱之義難進易退之規仰贊帝俞俯從愚願敢有脅肩諂笑固無沒齒怨言幸逢四海之昇平願指一丘而養老于黷清德兢惕實深伏惟云云

都統王令公賀冬

伏以律管潛吹星躔改候觀臺望瑞雲物呈祥伏惟令公每布祥雲常懸愛日三軍橫弩挾楚續以忘寒五夜枕戈擁孫衾而達曙必資景福早建殊功雅當肅殺之時便遂計除之勢四方聳耳佗聆大捷之音萬眾傾心永致中興之運某末由陳賀但切禱祈

浙西周寶司空

伏以禮慶履長傳標視朔夷夏契混同之運乾坤叶交泰之期伏惟司空相公浙水流恩吳山變俗既睹趙衰之日永洽物情願親傳說之星早環帝座未由

拜賀但切禱祈云云

前宣欵裴虔餘尙書

伏以禮稱迎日傳載書雲當寰中賀聖之晨是水外
寢兵之際宜陳善祝仰薦殊祥伏惟尙書政報褰帷
慶資温席已捧徵黃之詔固諧夢說之期人仰板輿
羨老萊之榮養帝留金鼎待伊尹之來調某雖戎律
拘身而清規在想末由拜賀但切禱祠

幽州李可舉太保

碾玉排方腰帶壹條并金魚袋壹枚金花銀
合盛重一百六十兩

右件腰帶體資廉潤功就琢磨雖慙鄂坂之金稍勝
延陵之縞珪璋比德宜親佩劔之腰霜雪呈華願近
生松之腹動則金章躍鯉靜乃寶匣盤龍既當屈以
求伸唯望服之無敦謹專寄獻遠表依攀伏惟恩私
特垂檢納

銀結條燈籠一枚

承燈蓋白盛荷葉一恭
木匣盛金銅鑲鑰並全

金花平脫銀裝硯臺一具

垂鈞香囊五枚恭
木匣盛金銅鑲鑰

全具

金花平脫銀裝硯匣并硯几一具

銀硯水瓶
等四事硯

几在第二匣內

右伏以持異物而奉異人嘗聆斯語覽遠書而愧遠
客亦驗古詩志常切於攀鴻事不慙於獻鵠每逢珍
玩則繫懇誠前件燈籠硯臺等鑄鑠成功披砂潤色
運巧而靈絲綴藻標奇而霞藻雕華高懸謂雲蓋凌
風遙視疑露盤含日龍膏豹髓偏宜卜夜於歡筵鳳
筆鵝牋亦可依仁於末席加以謝囊分掛孔硯深藏
虛心而只待含香蘊器而終能處默是敢徵美言於
舉燭寄微慊於濡毫伏惟無思宋殿葛籠僻敦儉約
或逞張旭草聖許近恩輝必可遠耀九光深滋五色
隔飛蛾而救物仁化彌彰研含麝以傳書德馨增馥

非無所採粗有可觀必望眷私俯垂容納幸甚云云

金花陷銀拓裏合大小共三具

銀接頭紅牙匙筋一十對

犀杓子四隻已上大合內盛銀裝茶碗四隻

在中合
內盛

犀樸子二十片在小合內盛金花銀脚螺盃

一隻

右件匙筋犀合茶碗螺盃等雖愧金盤粗勝棘匕鈿
玫瑰之表異固讓魏銘詠玳瑁之標奇敢徵潘賦所
貴者煙排翠點霞染纖條掌握增榮不慮劉使君見

失指蹤任意或希柳御史自攜況乃水族殊姿天成
雅器永免蜘蛛寄跡能將鸚鵡齊名稍謂珍奇遠思
寄獻伏惟靜籌帷幄許接罇罍對郭隗於高臺深傾
露液遣甘需於仙闕勝醉霞漿伏惟恩私特賜檢納
幸甚云云

織成紅錦繒壁兩條 暖子錦三疋

被錦兩疋 西川羅夾纈二十疋

真紅地絹夾纈八十疋

右件繒壁錦纈等龜城傳樣鳳杼成功張廣幅而宛
見虹舒疊綵繒而免慙鮫織雖五十里之誇步障則

難可爭光而四十疋之製戎衣則或堪入用亦冀備
會稽守晝行之服援平津侯夜寐之衾不咎輕微特
垂容納于浼斯甚兢慙實多云云

安南閩海路圖一面

西川羅城圖一面 并八幅紫綾緣

右竊以事畏人知切慙自銜孟側奔殿終著美於魯
論郟至驟稱果興譏於晉乘妍蚩可鑒今古何殊頃
者銅柱南標金墉西建開八百里之險路則雲將驅
石雷師劈山築四十里之新城則水神滲泉地媪供
土蓋乃感忠誠於上鑿標壯觀於外藩敢言簡在帝

心實匪率由人力今則八蠻歸化萬乘省方既能有
備無虞亦所當仁不讓去年嘗傳雅旨欲覽微功乃
徵於墨妙筆精遍寫彼長途峻壘宛如縮地不止移
山遠遣寄呈略希展閱必謂桂陽衛颯誠瑣瑣焉亦
知蜀國張儀是區區者恃深眷而不拘小節激壯圖
而無訝大言伏惟云云

徐泗時司空

垂容物色

右伏以縞帶紵衣魯史乃先其所出投桃報李周詩
用表於相知永言沼沚之毛豈讓琅玕之寶蓋防闕

禮只貴申誠前件物等雖曰土宜亦由波及實慙華
麗況至渺微難把八行盡寫傳心之語唯憑一介聊
陳藉手之儀伏惟眷私特賜檢納云云

田令孜軍容送器物

右竊以氣曠未銷道途尙梗久乖專信略達微誠每
憂於遠莫致之不敢以多為貴者前件器物貨非難
得器實易盈雖慙鏐銑之名願接罇罍之列輒將寄
獻遠表依攀伏望無掛意於四知幸流恩於一諾特
垂容納云云

振武赫連鐸尙書謝馬狗

右特蒙眷知遠有惠賚無庾亮的顛之害有陸機黃耳之能敢謂備於左牽右牽實爲酬於執勒執縶豈唯致遠況解防姦旣驅策之有期固指蹤而無失仰承重貺倍荷殊私未有報酬益多愧悚伏惟云云

幽州李可舉大王

青氊帳一口 金銅裝鉸具

右伏蒙恩私特賜惠賚委之專介衛以壯夫遙陟危途得張官舍不假棟梁交構能令戶牖全開出觀則一朵蓮峯入玩則千重錦浪加以頂標曉日額展晨霞靜吟而筠箔搖風俯視而地衣鋪雪舒卷皆成其

壯觀行藏永佩於深仁莫不衒沙漠之奇模駭江淮之眾聽臥龍竊譽固當高枕無憂虜豹成功必可運籌決勝唯期尅捷全賴庇庥荷戴所深啟陳何及伏惟云云

檄黃巢書 以下書

廣明二年七月八日諸道都統檢校太尉某告黃巢夫守正修常曰道臨危制變曰權智者成之於順時愚者敗之於逆理然則雖百年繫命生死難期而萬事主心是非可辨今我以王師則有征無戰軍政則先惠後誅將期尅復上京固且敷陳大信敬承嘉論

用戢奸謀且汝素是遐眎驟爲勅敵偶因乘勢輒敢
亂常遂乃包藏禍心竊弄神器侵凌城闕穢黷宮闈
旣當罪極滔天必見敗深塗地噫唐虞已降苗扈弗
賓無良無賴之徒不義不忠之輩爾曹所作何代而
無遠則有劉曜王敦覬覦晉室近則有祿山朱泚吠
噪皇家彼皆或手握強兵或身居重任叱吒則雷奔
電走喧呼則霧塞煙橫然猶暫逞奸圖終殲醜類日
輪闊輾豈縱妖氛天網高懸必除凶族況汝出自閭
閻之末起於壠畝之間以焚劫爲良謀以殺傷爲急
務有大慝可以擢髮無小善可以贖身不唯天下之

人皆思顯戮抑亦地中之鬼已議陰誅縱饒假氣遊
魂早合亡神奪魄凡爲人事莫若自知吾不妄言汝
須審聽比者我國家德深含垢恩重棄瑕授爾節旄
寄爾方鎮爾猶自懷鳩毒不斂梟聲動則齧人行唯
吹主乃至身負玄化兵纏紫微公侯則犇竄危途警
蹕則巡遊遠地不能早歸德義但養頑凶斯則聖上
於汝有赦罪之恩汝則於國有幸恩之罪必當死亡
無日何不畏懼於天況周鼎非發問之端漢宮豈偷
安之所不知爾意終欲奚爲汝不聽乎道德經云飄
風不終朝驟雨不終日天地尙不能久而況於人乎

又不聽乎春秋傳曰天之假助不善非祚之也厚其
凶惡而降之罰今汝藏奸匿暴惡積禍盈危以自安
迷以不復所謂燕巢幕上漫恣騫飛魚戲鼎中卽看
焦爛我緝熙雄略糺合諸軍猛將雲飛勇士雨集高
旌大旆圍將楚塞之風戰艦樓舡塞斷吳江之浪陶
太尉銳於破敵楊司空嚴可稱神旁眺八維橫行萬
里旣謂廣張烈火藝彼鴻毛何殊高舉泰山壓其鳥
卵卽日金神御節水伯迎師商風助肅殺之威晨露
滌昏煩之氣波濤旣息道路卽通當解纜於石頭孫
權後殿伫落帆於峴首杜預前驅收復京都尅期旬

朔但以好生惡殺上帝深仁屈法申恩大朝令典討
官賊者不懷私忿論迷途者固在直言飛吾折簡之
詞解爾倒懸之急汝其無成膠柱早學見機善自爲
謀過而能改若願分茅列土開國承家免身首之橫
分得功名之卓立無取信於面友可傳榮於耳孫此
非兒女子所知實乃大丈夫之事早須相報無用見
疑我命戴皇天信資白水必須言發響應不可恩多
怨深或若狂走所牽酣眠未寤猶將拒轍固欲守株
則乃批熊拉豹之師一麾撲滅烏合鳴張之眾四散
分飛身爲齊斧之膏骨作戎車之粉妻兒被戮宗族

見誅想當燃腹之時必恐噬臍不及爾須酌量進退
分別否臧與其叛而滅亡曷若順而榮貴但所望者
必能致之勉等壯士之規立期豹變無執愚夫之慮
坐守狐疑某告

招趙璋書

都統太尉馳問趙璋古人有言曰大厦成而燕雀相
賀湯沐具而蟣蝨相吊審其賀之與吊由彼依之與
違且爾同惡相成異謀斯構遽爲犯順尙敢偷安今
我水陸徵軍天人助信久審風雲之會遠揚雷電之
威卽當行展豹韜立擒梟帥尅收城闕靜剗煙塵想

計爾曹具知吾意但以先春而後秋者天之道重賞
而輕罰者君之恩遂乃馳吾咫尺之書問爾方寸之
事爾等依憑大憝猾亂中朝罪已貫盈理須誅剪然
若黃巢狠性能改雄心自新望其國封建彼家社勳
業可超今邁古恩榮可付子傳孫必爲致之速相報
也如或螳螂努臂猱猴磨牙輒欲拒張必當撲滅爾
須審詳至理勸誘元凶欲令天下知名早申忠節奈
何草間求活終作叛徒況居成算之中卽在覆巢之
下死生有命禍福無門唯審是非可知成敗所謂燕
雀相賀蟣蝨相吊實在於知與不知順與不順良時

易失嘉會難逢生爲有害之人死作無知之鬼深可
恥也深可痛也勉惟去就早副指蹤悉之

告報諸道會兵書

中和二年五月十二日具銜某謹告某州府節度使
逆賊黃巢自亂天常亟移星律縱使擢其賈髮詰罪
難窮未能吞彼狄喉稔奸斯極神誅可俟鬼怪何憑
而敢鳴張鳳城熊據龍闕至於五尺童子猶欲請纓
況在四方諸侯忍爲投袂偶屬朝廷密施廣畫先倚
甸侯不勞十道徵驅必謂一麾蕩定豈料軍令雖殊
於兒戲將名莫驗於童謠未暇舉旗旋聆反旆遂使

犬猶狂吠猿不驚號徒招翫寇之譏孰擅弭兵之譽
聖上翹飛日馭親省風謠蔭暘行恩睿慮則雖勞罪
已慕羶結望羣情則却怨後予然而自幸龜城久停
鑾輅秦雲遠隔蜀柳再芳每興霜露之懷聖情可想
未滅煙塵之患臣節何安某去年羽檄先馳牙璋後
舉唱義聲於遐邇養勇氣於偏裨於是廣徵陶侃之
舡久握辛毗之鉞畫鷁齊飛於雪浪檣烏高轉於煙
空必欲帆張曉風旗寢夜月纔離楚岸便到漢江直
驅背水之師永破滔天之孽而乃未施豹略頻降鳳
書已知諸道進軍不許遠藩離任詔旨云爲朕全吳

越之地遣朕無東南之憂是以再閱綸音遂回組甲
蓋乃仰遵帝命固非敢緩師期今則萬里專征誰能
奮翼三年縱敵尙許磨牙賊巢雖戲鼎中已居机上
掘尾狗子輒曾發狂斷頭將軍難可釋怒某幸忝握
兵之要固當仗義而行近奉詔條遍徵戎旅一呼巡
屬四集驍雄不唯被練三千實有控弦十萬已取今
月十八日部領兵士發離本鎮必得直趨汴道徑入
潼關立刻梟巢去迎鑾駕引舜風之無外覩漢日之
再中況都統王令公暗運智機別操戎柄已提勁卒
卽展奇功足可相應軍謀共興王略諸道自從賊盛

皆峻官榮凡爲食土之毛盡思効命矧乃荷天之寵
豈合安身且大丈夫之在世也壯氣難申良時易失
苟或美事讓他人之手殊恩負聖主之心則莫測肺
肝何施面目固應各勤訓練同願誅鋤瞻帝輦而魂
飛擁戎軒而背裂早看行色勿懷兒女之悲須把戰
勳永作子孫之福謹告

告報諸道徵促綱運書

謹告某州節度使夫忠於國者無以家爲是故漢代
微臣有傾產助邊之請魏朝烈士有舉宗陳力之言
況乃邊寄榮身兵符在手遇大朝之多難見上宰之

董戎而不能役致泛舟令行挈畚使戰士猶多飢色
將軍未獻捷書但忝分憂實爲忍恥某昨從中夏再
集大軍不慙素飽之名已誓無譁之眾仍差都押衙
韓汶先賫金帛百萬正救接都統令公軍前旣裝運
艇將扣飛檝言遵汴道徑指圃田必值徐戎來侵淮
口扼斷河路攻圍郡城近者又擁凶徒直衝近境敢
憑蝟結欲恣鯨吞當道旣見阻艱暫須停駐遂乃揀
徵驍勇往討頑凶伫靜封疆便登道路必可豁通綱
運廣備供輸行稱東道主人非無意也立斬南陽太
守竊有志焉諸道久荷深恩各居重任縱以家門寶

貨猶合贍軍況將州縣賦輿豈宜壅利其宣武忠武
天平昭義泰寧平虜河陽等道盡發雄師咸從統命
其依饋運各已通流其浙東浙西宣州江西鄂州荆
南湖南嶺南福建等道今欲踰年未聆發運若由水
路須入汴河如此稽留何因濟集必計杜畿美化遍
得人心任峻奇謀兼施兵力速請同勤饋輦繼發綱
舡齊至都統軍前早期收復京闕其徐州實爲國蠹
豈止鄰讎蓋以天暫容奸地猶聚慝昔爲龐勛叛亂
早合豬宮昨因時溥猖狂更宜塗地偶屬朝廷未誅
大憝不問小瑕貴悅軍情驟加爵賞而乃時溥罔遵

詔旨尙構奸謀去年曾犯淮山今夏又侵泗水乃作黃巢外應久妨諸道進軍先須剗當路之豺狼後可殄壞堤之螻蟻冀使隋皇新路楊柳含春無令漢祖舊鄉荆榛撲地凡承寵寄共察忠誠謹告

答浙西周司空書

某白忽覽來示驚憤兩深是何見事之乖如此發言之過且趙公約者背軍逃走行□追擒遽投跡於貴藩遂偷生於逋藪今則異端斯構細作爲名若能懷上士之心豈可信下人之口譚何容易事不酌量來示云位極上公權尊都統別興異見遽起他謀以何

悔尤欲爲燒劫此乃稍殊雅責僅涉穢詞鼠尙有皮蓋譏無禮駟難及舌亦誠慎言豈是不爲虐兮誠非所可道也司空晚歲縱不以學識爲□從事雋才亦合以智謀相贊虛成啗飯難望和羹未論是非須陳本末具標五信無貽一疑且此三世立功無非報國四方出鎮曾不安家身持將相之權手握恩威之柄豈獨撫淮邊之俗終期安海內之人方切緝綏何言侵伐其可信而不合疑者一也況今黃巾尙熾翠輦未歸方驅貔虎之師欲破豺狼之窟遠離弊鎮深託善鄰臨危而猶冀依憑守靜而更除損害其可信而

不合疑者二也司空早聯中外永保初終言既馥於芝蘭操彌貞於松桂曾無覺隙每有音書偏深魯衛之情永絕張陳之事其可信而不合疑者三也浙西始爲交代未得多時陶公之官柳誰移召伯之遺棠不讓至於賊壘猶將信義招降況是舊藩豈以兵戎侵逼其可信而不合疑者四也昨自師過江浦令肅雪霜軍門則擊柝夜嚴行路則銜枚晝靜豈有任從海則登舫趙公約則隔簾通報旣不難爲指麾又何易得直至上流嘉客不瑕接迎是何下等健兒敢來親近其可信而不合疑者五也粗申大較可察中心

何乃憑叛卒之讒詞失賢人之事體以此陳奏聖主以此傳告諸侯非我無辭是誰有過細尋來旨莫測貴懷爲當老耄所侵末年多變爲復狂迷偶作忠節遽乖夫耳不辨五聲曰聾耳不分五采曰昧司空久當重寄已謂元臣因何妄發莠言或似自懷蓬性不知彭寵此時有按劍之疑卻恐廉頗他日無負荆之處噫將帥則空榮列土君王則尙遠蒙塵更無匡復之誠唯有猜嫌之事祇隔一條水脉便興萬種風言必計心虛遂成口實大凡獻酬以禮來往爲書理失其中事生非小且須審諦勿恣豪強於此難盡私誠

非原始要終則必唱子和汝是以略陳梗概用察根源匪欲廣援古今所希暫曉左右僅同伐善豈免與慙君其審之僕所望也僕與浙帥周司空早於鳳里相識亦爲鴿原往還接載笑載言之時展如兄如弟之分況作建旗交代眞爲結綬相知旣睦比鄰罷局外戶江南江北祇鬪行春三楚三吳盡喧來暮方謂憑我友歲寒之節解吾君宵旰之憂豈料蒼烏高飛翠華遠狩僕以久叨重寄便決專征偶緣兵力未加人心尙懾遂於春首先發羽書仍請都統判官顧雲協律議共成之事謀相見之期固非閱被廬之軍徵

夾谷之會實欲親謀歃血方寫痛心若能接濟師徒粗得振揚聲勢而乃周司空卻自棄同卽異不能捨短從長忽疑惑於澠池謂矜誇於踐土便見戒嚴城壁阻塞津途構猜嫌而信有小人遺故舊而曾無大過僕雖逢彼怒但守吾眞及至中夏出軍外方多事眞安弊鎮旁倚近鄰又令幕客過江請爲都統副使豈銜弓旗之禮邀辟元戎祇憑鈇鉞之威撫綏近境周司空確乎阻意莞爾興譏不從固請之言自惜有餘之刃頻移曩顧但積沉猜見此初屯下瀨之師未設中流之誓猶淹水道久候天風軍聲旣振於四鄰

人意自防於兩岸偶有背軍官健趙公約者走投浙西鈞以巧言構爲細作便移長牒妄說異端其書云位極上公權尊都統別興異見遽起他謀以何悔尤欲爲燒却僕以趙襄子之忍辱念茲在茲藺相如之慎微有始有卒遂馳書牒具述事情聞司空尙發怨言自懷作色與宣護景虔貞徐帥時溥者暗資積釁相應密謀各興梗路之兵戈遍告沿江之郡邑以至練成戰陣鎖斷征途僕若不辭險阻之虞必致殺傷之患坐甲而未期破竹迴車而用待負荆尋屬繼奉絲綸不令離鎮遂驅組練卻已班師雖云帝命期遵

實乃鄰兵所阻彼宣州者亦有所因春初寇犯黔州勢侵旬水況值前廉已去新帥未來旣無禦捍之權恐落奸兇之便遂差押衙馮綬暫令安撫郡城蓋緣會奉詔書特許便宜從事凡於制置得以指麾景虔貞常侍菽麥不分蘭蕕莫辨謂言專輒遽有侵凌殺害軍人劫掠財物馮綬幾臨死所劣得生還自此隋國怨興謝城信絕將投彼鼠其如有礙之時欲償於豚又是無端之事且爲舍忍未及通和必知橫被織羅巧成貝錦傳之於遠誰曰不然噫滔滔者天下皆同君子所恥泛泛如水中自樂壯夫不爲但問事之

若何則知曲之在彼今則特垂教督益驗獎憐自緣
有理可申豈便無辭以對固非飾過不敢憑虛莊生
不云乎其智適足以知人之過而不知其所以過若
非辱殷勤之旨何以息睚眦之詞僕也不能嫉惡如
讐唯以用和爲貴但以賢愚共惑本末未彰復書而
不覺詞繁比事而終慙理短身修三省勉尋曾子之
規心敬一言永荷伯陽之惠幸垂鑒志某頓首

答徐州時溥書

六月十六日某白僕射足下特辱長牒仍移公牒細
詳來旨頗涉多端有同戲以前言無乃驚於眾聽雖

倚兵強力壯其如作僞心勞且泗州舊隸仁封新標
使額固非郡守專輒蓋是朝廷指揮爲在頃年獨全
忠節遂編名於防禦永傳賞於驍雄近者久結鄰讐
蓋遵國典獨行直道固守危城嘗膽爭先斷頭非苦
此亦古人云寧爲忠鬼不作叛臣之義也況于尙書
有定國恩威有栗磔武勇自安疲俗甚洽羣情每將
勾踐單醪均沾無黨不獨臧洪薄粥分啜有餘固當
散三年之儲充一日之費寡能敵眾安可待勞豈比
於築室反耕杜門卻掃者哉忽睹來示云泗州獨阻
淮河自牢城壘使四方多阻諸道莫通而又每於朝

廷妄爲訕謗今有城中將校潛來計圖請少振兵戎
卽便期開泰者大凡人事莫若自知足下去年忍隲
不禁求榮頗切暫奮橫行之氣果成順守之權是以
累受國恩遠膺藩寄豈可尊身忽物是已非人偏致
嫌於藺生終歸過於季氏其於淮河久阻道路不通
皆因貴府出兵不是泗濱爲梗是非可辨遠近所聆
去歲夏初早蒙侵伐呼蟻軍於漣水拒虎旅於淮山
此緣將援親仁難逃善戰爰謀薄伐用救倒懸君異
苟吳莫振受降之譽僕慙呂布有虧解鬪之言泗州
以實奏陳豈爲誇譁僕也雖慙知己嘗敢薦賢亦曾

錄詔寄呈必合垂情見悉誰料旣踰望始翻起釁端
甲兵繼興疆場頻駭所云泗州城中將校頻來計圖
此乃巧飾虛辭遍行長牒盡知譎詭孰肯詭隨朝廷
以足下身處雄城刃多餘地委推綱運冀濟權宜但
自戢歛兵車必得通流饋輦今則卻云奉朝廷意旨
收徐泗封疆廣出師徒難窮事意必若足下訓戎勇
銳報主忠勤何不親總全軍往殲巨慙早立非常之
効以酬不次之恩而乃知僕再次西征卽謀北渡便
侵泗境來犯淮孺負國家之寵榮搆州縣之患害幸
其賊勢阻此師期未諭雅懷何辜聖獎言但繁於枝

葉事莫究於根源來示又云此皆廬州海州皆爲背
叛累來投款不遣措詞者強謂恩情形於書札顏雖
不厚心且何安彼東海廬江偶聚奸惡異端斯起旣
非鄭有人焉同氣相求盡是跖之徒也足下已居重
任不徇危謀自守詔條何煩飾說僕累將軍食煩救
臨淮爲分順逆之蹤令保始終之志實以泗州曾非
杞子之無禮亦類展禽之有詞每當告急告窮唯以
行仁行義唯望足下暫息餘怒深量遠圖且先報國
之誠無急伐鄰之役兼覩詔書獎諭請與忠武協和
足見睿情俾銷微憾在於臣子合更慎思求將安撫

氓黎速自追迴士卒苟或上負君命下違物情隔礙
征途侵凌近境則亦難辭借一用試當干必見傷禽
易驚困獸猶鬪悔須防後險已居前矧乃泗州以抱
節爲命貴鎮以翫兵爲務泗州則唯遵王化貴鎮則
虛構牒詞以較否臧可知曲直是敢遠申忠告冀絕
後誣正當聖主蒙塵未除禍難何忍諸侯列土更起
兵戎猛發忠言懶爲諂笑勉思大體勿暴小瑕必因
此日所箴卻得後時見謝幸從誠信無損功名某官
頓首

答襄陽郟將軍書

中和二年七月四日具銜高某謹復書於將軍閣下
某側窺前史嘗慕古賢贈人以至言則老聃垂誠成
我者良友則管仲知恩但恨季俗寢訛芳規僅喪豈
期今日得覩餘風將軍唯恐掩瑜欲令磨玷特勞彩
翰遠辱長牋初尋歸美之獎詞汗驚浹背後覽扶危
之箴論淚迸沾頤既乃粲然可觀焉敢率爾而對輒
憑毫素仰疏血誠終冀恩私略垂採覽幸甚幸甚某
自去年春知寇侵秦甸帝幸蜀川欲會兵於大梁遂
傳檄於外鎮練成軍伍選定行期便被武寧忽興戎
役先侵泗境後犯淮壩聲言則狼顧舊封實意則鯨

吞弊鎮長驅猛陣直犯近疆是以分遣偏裨果殲兇
醜及當中夏乃出大軍既知其北路阻艱遂決於西
征利涉尋奉詔旨云卿手下甲兵數多眼前防慮處
多但保淮南之封疆協和浙右之師旅爲朕全吳越
之地遣朕無東南之憂言其垂功固亦不朽某以兵
機固難自滯君命有所不從已事征行必期進發占
風選日只欲奮飛又奉七月十一日詔旨云諸道師
徒四面攻討計度收剋旦夕可期卿宜式遏寇戎饋
輦粟帛何必離任則是勤王或恐餘孽遁逃最要先
事布置以此再承綸旨遂駐舟師唯廣利權宜供戎

費殊不知進退唯命始終無虧卻被近鎮讒誣聖朝
猜慮食駃騠之良肉何敢望焉絆騏驥之駿蹄無能
爲也遂使忠誠未展睿獎難期非敢自辜海內之人
心但養淮邊之兵力詢之於理良有所因將軍以泗
州舊屬彭門謂某妄爲占護必慮未詳狡計或援浮
詞且徐州昨自併張更無戢歛威權旣盛暴虐轉深
見某自五月初再謀征討已排勁卒欲援令公兼差
都押衙韓汶先資一百萬貫救濟都統軍前盡載舟
船將臨道路又興兵甲來擾疆陲把斷淮河蒞成寨
柵是以行計猶阻羣情莫安細察徐州所爲是作黃

巢外應不然則何以每見當軍臨發卽將兇黨奔衝
又乃□□泗濱阻絕汴路且臨淮則城孤氣寡劣保
疲羸彭門則地險兵強恐行狂悖以茲斟酌可見端
倪況無諸道綱船曾過泗州本路今則皆因此寇卻
滯諸綱近則浙東浙西遠則容府廣府並未聆饋運
何濟急難某見發楚師俾誅餘孽一則遵行詔旨救
援鄰封二則得靜長淮欲登征路固非貪泗民之租
稅排徐師之兵戎蓋分曲直之端將保初終之節泗
州二年閉壘一境絕煙織婦停梭耕夫釋耒滿城軍
食猶仰給於弊藩闔郡賦輿固難徵於疲俗將軍謂

某藉其地利搆此鄰讐細閱來言難知深意泗州不獨咸通之際得振雄聲曾於天寶之中亦遵直道況于濤尚書政條既舉武略兼精收百姓之歡心得三軍之死力將軍便令棄而不問理復如何徐州實有大憊固非小患若將助虐豈謂輸忠某今所俟者戮當道之豺狼奮乘秋之鷗鷺星言夙邁電擊專征必與王令公腹心見知首尾相應齊驅虵陣豁轉豹韜剋復上京奉迎大駕亦不敢負秣陵之節度爭強弩之功名所冀得繼前勞自防後患使藺相如之謙德不損雄威費無極之讒徒皆歸顯戮捨此之外餘無

所云敬佩良箴豈離愚抱伏惟鑒察某再拜

時浙西周寶司空書

昨奉公牒云當道臨淮叛卒過江來投集眾廣場已受降訖三復來示言難不酬且降之爲名其理甚大虞舜之七旬苗格晉侯之三日原歸此皆以干紀亂常起兵動眾緩之則稔成患害急之則橫致殺傷遂假小慈終施大信能敷德化俾革奸兇若有偶聚萑蒲散爲榛梗者共須撲滅勿使晏安今相公幸此鄰灾樂其軍禍莫能嫉惡翻欲惠奸恐乖杖鉞之威虛銜倒戈之捷且如去年陳儒徒伴唐突貴鎮封疆僅

有六萬餘人宣州日告危急此時相公何不招諭致令侵凌卻見瑣瑣頑兇卽自勤勤誘引莫測高旨實辜眾心傳不云乎夫召外盜書不云乎爲逋逃主稍詳至理無信虛詞昔漢朝匈奴叛黨來附景帝便欲與之封周亞夫曰彼背其主而見賞何以責人臣之節以小喻大可量事情況臨淮一郡早從淝上行營及淮邊戰敵每有優賞曾無偏頗自是臨財則競起貪心遇賊則皆無鬪志旋爲逗撓猶與矜寬昨又請換都頭已依眾請殊不知犬易興於狂瘕豕難制於喧豗未盡誅擒便謀奔竄幸且未離近境固合同塞

奸源在此旣已不忠於彼亦應非利石祁子所云天
下之惡一也惡於宋而保於我保之何補其在茲乎
況凡鄰府事宜一彼一此互相救援同致安寧是以
前年六月中貴鎮有天平潞府元從兵士背叛奔逃
數僅百人爲患非小遂蒙移牒請爲追擒當使差都
將梁楚部領馬軍所在討襲并各帖管內諸州令差
精兵同力捕逐尋卽諸鎮及東塘遊奕使相次收獲
三十八人纔見擒來便令押送續得梁楚狀報到濠
州界趕及殘孽殺得三十餘人其餘漏網之徒盡以
傷弓而走所生擒之兇黨皆就戮於貴藩能致彼之

快心實賴此之勞力今則卻見臨淮叛卒特向沿江
招呼便稱受降仍□補職累牒咨請不送過江蒐慝
何多養奸斯甚敢言以怨報德實恐在安忘危詩云
投我以木瓜報之以瓊瑤匪報也永以爲好此乃國
風遺訓昭晰可觀相公通仁略賜詳度無自賈天下
之戮笑也其他已具迴牒伏惟俯賜矜察

浙西護軍焦將軍書

昨有臨淮背叛兵士誅擒不盡奔迸過江便蒙貴鎮
相公特許歸降遍加補署兼移公牒頗構虛詞旣乖
七縱之謀誰謂三驅之禮蓋是幸灾樂禍固非撫士

安人自古受降之義也叛而伐之服而捨之忠信能
敷德刑乃就或以賊數則動盈千萬奸謀則難測二
三若欲戰爭恐多傷殺或吹笳感動或書箭招呼免
致膏鋒俾從肉袒其或藁禽兇狡率然叛離免奔岡
而終必自顛鼠失穴而欲將安往在於接境合與同
擒不料豁開叛換之門深作逋逃之藪慰安螻蟻雖
欲好生訓練熊羆有何用處纔招稔惡之輩遽銜受
降之名蘊豹韜而略不施張對龍節而恐須慙愧魯
史云晉楚設誓無相加戎同卹灾危備救凶患若有
害楚則晉伐之在晉楚亦如之交贄往來道路無壅

謀其不協而討不庭此則古時敵國猶保語言今日善鄰豈傷師律況晉楚則各在遠地揚潤則只隔長江曾無交惡之端豈有相欺之事實驚眾聽甚爽遠圖已無蠶女爭桑永安兩境宜效農夫去草靜剗本根伏惟將軍遠護兵符共成王事必不欲和之如響知而不言唯望稍致良箴終除巨弊永使必誠必信誰云莫往莫來此既無噂嗜以背憎彼亦免忸怩於顏厚幸垂採聽特惠終始伏惟云云

滁州許勅委曲 以下委曲

報許勅得狀知妻劉氏將從征討願效勤勞嘉尚之

懷諭言不及吾嘗覽後魏書見楊大眼者武伎絕倫戰功居最其妻潘氏頗善騎射至於攻戰遊獵之際潘亦戎裝齊鑣並驅及至遠營同坐幕下對諸寮佐笑言自得大眼時指諸人曰此潘將軍也吾思見若人爲日已久不期今夕得舉妙才此亦可謂劉將軍矣想鼓鼙方振琴瑟相隨既在同心可知竭力教戰則必欺孫武解圍則可假陳平勉致殊功卽行懋賞悉之不具云云

昭義成璘

報成璘大夫魯史云臣一主二漢書曰一心可以事

百君則知下有離心蓋爲上無全德姪孫僕射夙虧家訓驟荷國恩累忝藩方曾微績効每於撫俗略不隨時恩威豈得並行寬猛無由相濟況近關西之賊窟持山北之兵權戰伐旣勞緝綬莫至固知軍情潰散物議喧張大夫名旣超倫事能從眾息貔貅之憤怒慰黎庶之疲羸實謂有三雋才誰云犯五不韙古之所有今也何疑遠遣專人迎取家口儻或行程齟齬且令彼處婆婆如能斷送出來便與支持發遣一踣墜履猶能牽念舊之心百口孤孀何忍見含愁之色必應慰暖免至饑寒倚望所多諭言無及彼但勤

修改理仁荷寵榮不令外盜侵凌必見大君委寄冬寒慎爲將息節級各與安存悉之

廬江縣令李清

報李令昔有桓榮祖者少曾學武或曰何不學書答云上馬橫槊下馬談經方可謂不負飲食矣若無自全之伎何異於犬羊乎昨見所申眾情可獎昔也一
百里之疲俗託在神君今則十八砦之義兵請爲軍帥若非寬將猛濟惠與威行則何以蠲旣懷仁各能遂性熊羆聚黨盡得降心姑拋堂上之琴便握匣中之劍所謂文一變而至於武者也況李令族聯天派

名比水源才機爲一代之雄心術是萬人之敵足得
以指麾銳卒掃蕩叛徒不惟除郡邑之灾亦可定國
家之難然而軍務旣常獨理職銜須有可稱未見所
求固難抑致爲復願兼知戎役卻守縣曹爲復欲改
轍從知乘機立事察斯二者決取一途專期奏論早
與飛報且如班超投筆蒯恩捨芻當池蛟得水之秋
有天驥追風之便古詩云寧爲百夫長羞作一書生
信知倜儻之人懶守低徊之節勉成勲業永荷寵光
戎務方殷善自將息諸寨將士各與慰問悉之

淮口鎮李質

報李質覽所申狀慰愜良多李再興未革狼心敦張
蜂目構稱虛事違負本軍初憑逐寇之名卻設起戎
之計賴質深懷智策善審兵機一唱義聲四圍逆黨
狀疾風之掃危葉如烈火之熱飛蓬再興將見誅夷
果當懾竄然旣是傷弓之物必爲覺鼓之資兼知質
男裕黃口小兒血氣未定偶虧嚴父之訓以涉叛夫
之謀質又徇公絕私捨曲取直愛而知惡義以滅親
削其舐犢之言遵彼烹臯之理若非忠勇何得如斯
古語有之蝮蛇在手則壯士斷其節是乃忍小痛而
除大患也況石碣傳芳於魯史日磬載美於漢書故

事斯存令名不朽足以見質有大丈夫之氣有真君子之心權兵而動必成功鎮境而靜能守節前勞後効日就月將固當榮盛可期勿以滯淹爲恨勉安軍旅善保勲名以古況今惟吾知汝悉之

光州李罕之

報李罕之成覲有言彼丈夫也我丈夫也然則成功立節不獨古人仗順輸忠正當今日近奉勅書手詔無非激勵眾心兼除王令公充都統西門軍容充都監此乃藩鎮功虧朝廷計盡遂將大任專付老儒雖漫傳聲必難濟事此去年齊驅猛銳將掃頑兇尋奉

絲綸俾安淮海詔書云爲朕全吳越之地遣朕無東南之憂遂乃旋師不敢違命然則審詳物議參酌軍期關中有執斧之徒關外無枕戈之志誰能竭力實可痛心吾若不行眾將焉往今欲直趨汴路便入潼關柙復鳳城奉迎鑾駕永使流傳萬代終能肅靜四方罕之已處分憂久爲養勇必欲揀精練銳以期伐叛摧兇今錄勅書手詔白寄往仰窺聖旨必勵忠誠便決征行共圖富貴時不可失吾子勉之故此告知速宜飛報悉之

楚壽兩州防秋迴戈將士

報王承問等久勞防戍又役戰征知得遠歸良多慰
愜詩稱束楚不免怨思傳載及瓜亦嘗憤恚古之難
事今見忠誠況承問限過三年訓齊一旅值國家之
多難息鄉井之懷歸言下忘身軍前効命遂得永別
伍符之列高登八座之榮固知實勤豈慮虛擲且往
年被練而去今日衣錦而迴孫權努力之言已成顯
驗王昶寶身之誠更慎操持深秋遠行善自將息節
級將士遍與安存遣此不具

歸順軍孫端

報孫端將軍自從歸投久處閑散想多鬱悒不暫弭

忘但以端職秩已高官資須稱使司累具奏薦朝廷
則有指揮且仰安撫師徒仰迎恩命古人貴其晚達
君子誠其速成王化既無偏無頗寵章必盡善盡美
勉期順守勿念躁求秋晚其涼切慎將息節級遍與
慰問悉之

楚州張雄

報張雄中丞得狀知已黥練兵士兼請出軍西去討
逆賊徒憤氣勃興忠詞懇切覽之嘉歎深寘於懷且
每值寇戎稍侵疆圉雄必心騰勇略首唱義聲去年
已建殊功今日又申丹請不辭危於馬革願展用於

豹韜實謂起予者雄始可與言兵已矣則帝委之以
郡侯吾待之以國士永揚茂績固在良時然彼州司
事力猶困未可便謀征役且宜更候指揮兵士各與
慰安秋深善自將息馳此不具

楚州張義府

報張義府得狀兼送罰錢引咎自責足驗用心古語
有之人誰無過過而能改善莫大焉饋餼之義春秋
所重在於屬部豈可外交勿爲饑則附人別欲申於
知己將滅白圭之玷遂以金作贖刑細覽來詞似懷
他慮膚受之愬固不行焉但慎始終永圖富貴悉之

滁州許勅

報許勅語曰兵食可去無信不立則知守信之道乃
是立身之本歟苟若壞隳自爲顛覆訪知近日浙西
周相公頻差上元鎮使馬暨專賞書曲兼將金銀送
到和州說誘秦彥令歸浙岸許授雪川信使繼來事
情甚細則未知秦彥終欲如何且浙西素乏勲勞驟
沾恩寵謂得長久遽爲驕矜殊不知人盡指楹鬼多
瞰室惡旣天稔道唯日亡今更阻絕我通津動搖我
屬郡已乖眾議可見前途以勅直木千尋精金百鍊
固無憂於邪曲終不改於貞剛況乃邦媛相隨家肥

是保永除異慮必享同榮或恐未審浙西所爲先此
告示悉之

壽州張翱

報張翱知已部領兵士將赴令公軍前言念遠征倍
所加念且杖鉞者皆誘闔外分珪者略滿囊中而乃
顧家產爲遠圖剗國讐爲閑事唯矜肉食孰肯身先
今則翱首唱義聲躬提銳卒騁大丈夫之志氣副上
宰相之指蹤況知素蘊機謀久施訓練仁伸壯節必
樹奇功當五馬離鄉遠地之芳聲獨振及六龍歸闕
前程之變化難量暫此苦辛善爲將理今附衣段銀

器茶藥等往到宜檢領春寒慎爲行李將士倍與慰
安馳此不具云云

廬州楊行敏

報楊行敏使至得狀送芝草圖一軸覽之嘉歎喜有
餘懷且草木之祥異也雖自天成皆因地秀物有所
應吾何以堪行敏始假郡符已彰瑞謀天其誠爾爾
宜慎之況鄉號千年村名穀祿足驗一百年之壽與
二千石之資固保前程之富貴矣將酬美貺更勵忠
誠非恡獎詞慮驕銳志悉之夏熱切好將息使迴附
此不具云云

和州秦彥

報秦彥尚書使至得狀兼送羊五百口勤誠斯展其數實繁所謂爾羊來思我愛其禮况彥雖榮建隼能効懸魚遠傳廉慎之名深舉撫綏之政而乃特申懇悃倍所歎嘉既無慮於觸藩勉致功於荷筮使迴附此不具

盧傳

報盧傳殿中監裴尚書將到洪州武寧縣人吏百姓及僧道等狀舉論傳前後戰敵賊徒保全縣邑功績一十五件細覽事實慰愜滿懷傳不云乎公侯子孫

必復其始傳能資餘慶無怠事修自值危時便揚壯節一呼義旅四討兇徒兄弟二人義聲俱唱遂得疲疇獲賴廉使見知始提百里之權尋假六條之寄忠誠所至寵命非遙勉慎始終穩圖富貴所希薦舉必不弭忘悉之

戴盧

報戴盧殿中監裴尚書經過彼縣日得百姓僧道等狀舉論盧自乾符五年主鎮兼知縣事課績一十三件事皆摭實情切舉能詞理燦然良增慰愜盧竭誠報國傾產忘家糺集義軍訓齊宗族撫寧羸瘵捕襲

寇戎六年於茲一邑獲賴有功不伐唯善是從遂領
縣曹永安鄉黨古者田稱續命邑號義興求之於盧
未足多也既增嘉歎不忘薦論勉保忠誠終邀美命
悉之

光州王緒

報王緒天不容奸人唯助順苟違至理必亂常刑知
緒昨因顏璋久藏禍心果致眾怒璋既誅戮緒乃奔
逃何不束手戎場投身義域而敢更謀嘯聚尙恣喧
張自招相鼠之譏莫識牽羊之禮未知爾意終欲奚
爲此乃先惠後誅武經所重奸生惡殺王化斯行豁

開誘善之門俾躡歸仁之路遂加誨諭試問端倪速
仰割捐本情指陳他望待詳來狀卽與指麾禮云志
不可滿傳曰惡不可長緒之今日其意若何勿驅齊
叱枉入罪網秋冷切好將息節級各與慰問悉之

楚州營田判官綦毋夔

報綦毋評事夫欲均調兵食固須妙選公才供億既
多料量非易評事自匡郡政甚洽物情剗割而案無
滯詞淬磨而筆有餘刃今委兼判順國軍糧料舉牒
同封寄往孔聖猶爲委吏蕭何亦作功曹唯託幹能
無辭猥屑欲令小人懷惠仁看君子勞心悉之

鄆州耿元審

報耿元審古來名將多是耿家恭賈秉弇徽音相繼
永言苗裔固瞻機謀元審雖名異震聲而志能獨立
伫申忠勇別埃恩榮況逢危難之秋實建勲名之日
勉存終始慎守行藏其他並令樊谷面述今寄衣一
副烏觜茶二斤到宜一一領之秋涼切好將息悉之

海陵鎮高霸

報高霸得進奏院狀報知轉授右散騎常侍永言欣
愜霈然滿懷昔周盤龍破虜有功繼霑爵賞齊世祖
戲之曰卿着貂蟬何如兜鍪對曰此貂蟬乃自兜鍪

中出耳當時以爲名對前史標之美談今此官榮實
彰君寵唯在專勤戍邊固守邊陲更俟大來永揚忠
節知之

淮口李質

報李質得進奏院狀報知質轉授右衛大將軍且自
數年君恩溥洽官榮職賞可謂均沾然而成功可爲
受爵無愧者屈指而數能復幾人唯質久戍淮壖遠
防寇孽勤勞最至品秩尙卑今授大將軍之名乃滿
烈丈夫之望更宜慎守無慮湮沉慰愜歎嘉不離懷
抱遣此不具云云

野豈此不具云云

照丈夫之望更宜勤守無懈無承想甜酸嘉不勝
兩家尊禮敬拜至品好尚事令對大將軍之召
受福慈謝香風能而獲道真樂人非貴人又新
還手吾恩與命有榮耀實可謂良高然而亦
辨幸實與我奏謝恩時以得轉對白滿大將軍且自

辨日李賀

附取之

幸持諸部在再謹如以固守幾到與對大將軍
甲出百餘湖以爲台惟前與對之美始今此官榮

